

畿輔通志卷二百十八

列傳二十六 明三

明

保定府

張居敬

武彧

何禮

薛大昉

李原名

劉觀

邱鵬

劉知微

韓傑

王興

高嗣興

宋烜

陰煜

王寅

劉源

王玘

胡斌

李友直

趙豫

寇深

子林

楊澤

郭璉

王驥

五世孫瑾

田禮

趙敬

馮珪

李福 曾孫高
從孫文深

王哲

李敏

王文

楊瓚

張哲

陳忠

崔忠

邊靖

吳祥

何翕

谷俊

何貴

王瑾

宋傑

孟鑑

馬恭

劉慶 父普安

李俊

樊忠

黃鍾

吳麟

賈俊

李宏

呂斐

楊宣

孟淮

侯瓚 子觀

程章

韓文

王道

黃縉

李鳴鳳

吳櫝

馮貫

曹臻

王庭器

白旻

梁琮

張謙

劉瑀

張勛

劉瓚

張貫

齊壽

徐鵬

李儼

胡昂

朱英

王寅

劉大甯

張天衢

傅珪

子棨

楊潭

丁鳳

李春

李勉

王凱

劉愷

李師儒

張宦

子敕

馮蘭

韓春

宋連

李棠

鄭陽

郁琛

魏彥昭

劉錦

仇惠

郭鳳

石宗岱

王堯封

冉繼志

李緯

張紹烈

田蘭 父昭

王德明 父恩

石麟

袁宗儒

邵錫

羅錦

段棗強

劉奎耀

張效仁

賈道

韓澄

宋大本

張文全

南壽

呂應祥

陳讜

劉恩

高顯宗

許瑤 曾孫顯達
元孫代興

李瑟

李性

王荔

李鳳

喬英

劉道亨

王沼 子楓

王祚

張舜元

崔三畏

趙允亨

何思

高燿

郭天祿

岳倫

劉卓

張鎬

劉乾

郭鎮

子存謙

李時芬

趙宸

劉止

康一元

楊繼盛

子應尾

陳典

宋登

王用賢

徐行

李涑

鄭洛

宋大儒

王汝梅

劉堯卿

王軒

許大亨

宋豸

師道南

劉秉仁

明

保定府

張居敬保定人洪武初知武康縣公正廉平吏民畏服

浙江通志

武彧保定人洪武初以博洽賜侍讀三年魏國公奏令訓教諸王時成祖在潛邸每與討論講史二十年始歸永樂元年徵授侍讀學士以老乞休賜敕以贈其行有博通六藝貫徹五經允儒林之碩望誠國家之著龜等云時人榮之

康熙志

何禮清苑人洪武初以才行卓異舉用累官兵部尙書奏言廣東廣西福建浙江湖廣江西淮安蘇州等處徵收馬草及支放馬料宜除各衛年老殘疾軍士宜準其擇丁更代管軍官拘留者宜按治皆允行又請令天下衛所於農隙時選善射者更番赴京校試中者賞鈔五錠連中者十錠不中者給道里費而罰其指揮千百戶上亦嘉納尋以事免官

分省人物考

薛大昉蠡縣人洪武四年進士任翼城縣縣丞以清慎得民尤盡心學校延元翰林李炳奎掌教士習丕變居翼城凡十

年擢御史累遷布政使祀名宦

山西通志

李原名

分省人物考雍正志均作孝彥名

字資善安州人洪武十五年以通

經儒士舉爲御史二十年使平緬歸言思倫發懷詐窺伺宜嚴邊備靖江王以大理印行令旨非法爲遠人所輕稱旨擢禮部尙書自是遠方之事多咨之高麗奏遼東文高和定州皆其國舊壤乞就鐵嶺屯戍原名言數州皆入元版圖屬於遼高麗地以鴨綠江爲界今鐵嶺已置衛不宜復有陳請帝命諭其國守分土無生釁安南歲貢方物帝念其勞民原名以帝意諭之令三年一貢自是爲定制又以帝命行養老之政申明府州縣歲貢多寡之數定官民巾服之式皆著爲令初以答祿與權言建歷代帝王廟至是原名請以風后力牧等三十六人侑享帝去趙普安童阿朮而增陳平馮異潘美

木華黎餘悉如原名奏魯王薨定喪服之制進士王希曾請
喪出母原名謂非禮宜禁凡郊祀宗廟社稷嶽瀆諸制先後
儒臣論定時有詳畧帝悉令原名更正之二十三年以老致

仕明

劉觀雄縣人洪武十八年進士授太谷縣丞以薦擢御史三
十年署左僉都御史坐事下獄尋出為嘉興知府明史有囚罪

當死於掌中書黃金二千乘鞫訊時屢伸手示觀觀截其手

以進遂蒙眷注

分省人物考

尋丁父憂永樂元年擢雲南按察使

未行拜戶部右侍郎二年調左副都御史時左都御史陳瑛

殘刻右都御史吳中寬和觀委蛇二人間務為容悅四年奉

命採木浙江未幾還明年冬帝以山西旱命觀馳傳往散遣

採木軍民六年擢禮部尙書十二月與刑部尙書呂震易官

坐事爲皇太子譴謫帝在北京聞之以大臣不宜遽折辱特
賜書諭太子八年贊都督僉事費瓛討涼州叛羌還坐事謫
本部吏十三年還職改左都御史十五年督浚漕河十九年
命巡撫陝西仁宗嗣位兼太子賓客旋加太子少保給雙俸
大理少卿弋謙以言事忤上意尙書呂震大理卿呂謙希旨
奏劾觀復令十三道御史論其矯誣以是爲輿論所鄙宣德
初朝臣以奢相尙歌妓滿前觀私納賄賂而諸御史亦貪縱
無忌三年六月帝召大學士楊士奇楊榮至文華門諭曰祖
宗時朝臣謹飭年來貪濁成風何也士奇對曰永樂末已有
之今爲甚耳榮曰永樂時無踰方賓帝問今誰最甚榮對曰
劉觀又問誰可代者士奇榮薦通政使顧佐帝乃出觀視河
道以佐爲右都御史於是御史張循理等交章劾觀並其子

輻諸賊汚不法事帝怒逮觀父子以彈章示之觀疏辯帝益

怒出廷臣先後密奏中有枉法受賂至千金者觀引伏遂下

錦衣衛獄明年將至重典士奇榮乞逮其死乃謫輻戍遼東

而命觀往觀竟客死

明史

邱鵬唐縣人洪武二十一年進士擢御史知無不言言無不

當後得罪籍其家止木匙二張木筋五雙皆鄉物也上嘉其

清復授廣東按察使卒祀鄉賢祠

康熙志

劉知微清苑人洪武中為禮部侍郎凡有建白悉見採納使

安南卒

雍正志

國王以銀棺歛之

康熙志

喪歸予葬祭

雍正志

韓傑滿城人洪武中以孝弟授浙江吉安縣主簿城守有功

歷陞兩浙鹽運使祀鄉賢祠

保定府志

王興新城人母病興臥冰白溝河上額天如是者二年母病

遂愈洪武時旌

大清一統志

高嗣興唐縣人洪武中以分才上疏陳王道及官民利病太

祖嘉獎擢兵部主事累官至尙書

雍正志

宋烜唐縣人洪武中以人才薦官祁縣廉慎有為遷御史復

出為知府

山西通志

陰煜容城人洪武間任聞喜以廉幹稱

山西通志

王寅高陽人洪武間以明經薦為洛陽訓導又以經明行修

授禮科給事中以敢言忤權要出為思州府宣布威德蠻夷

歛戢

分省人物考

劉源字本清滿城人洪武末以茂才薦除汝甯府經歷明敏

果確有豪強犯法源如律按治郡守為緩頰源厲聲面折守

恚竟借他事中傷之賴臺司力白其誣遂解組

保定府志

王玘安肅人洪武末官浙江按察司僉事振肅風紀咨詢民

瘼有聲於時

浙江通志

胡斌雄縣人洪武末雄被土寇劫掠枕骸蔽野行者心悸斌躬荷荆筐盛尸別男女爲叢塚以葬之越六旬而賊事

雍正志

李友直字居正清苑人讀書通大義兼習律法靖難初時以

首發密事擢北平布政司參議永樂紀年建北京設行部除

左侍郎以事謫戍尋復官綜理沿河輸運諸務利興害去人

咸德之調行在工部署兵部事成祖崩友直以居喪不謹降

順天府丞尋陞工部右侍郎遷尙書改北京行部奉命代祀

秦中前代陵寢還朝懇懇以軍民利害爲言宣宗繼統改行

在工部命往西蜀董夫匠鳩工料材軍民稱便英宗臨御敕

繕葺京倉濬通濟等河規畫裕如正統三年以疾卒

分省人物考

趙豫字定素安肅人燕王起兵下保定豫以諸生督賦守城
永樂五年授泌陽主簿未上擢兵部主事進員外郎內艱起
復洪熙時進郎中宣德五年五月簡廷臣九人爲知府豫得
松江奉敕往時衛軍恣橫豫執其尤者杖而配之邊衆遂帖
然一意拊循與民休息擇良家子謹厚者爲吏訓以禮法均
徭節費減吏員十之五巡撫周忱有所建置必與豫議及清
軍御史李立至專務益軍餉及姻戚同姓稍辨則酷刑榜掠
人情大擾訴枉者至一千一百餘人鹽司句竈丁亦累及他
戶大爲民害豫皆上章極論之咸獲蘇息有詔減蘇松官田
重租豫所轄華亭上海二縣減去十之二三正統中九載考
績民五千餘人列狀乞留巡按御史以聞命增二秩遷任及
十年春大計羣吏始舉卓異之典豫與甯國知府袁旭皆預

焉賜宴及襲衣遣還在職十五年清靜如一日去郡老穉攀
轅留一履以識遺愛後配享周忱祠方豫始至患民俗多訟
訟者至輒好言論之曰明日來衆皆笑之有松江太守明日
來之謠及訟者踰宿忿漸平或被勸阻多止不訟以愷悌稱

明史

寇深字文淵唐縣人永樂初充郡庠生上書言時務升補太
學生偕中官陳保孫勘山東軍需錢穀歷三年始還積弊一
清宣德初擢刑部主事遷員外郎善決疑獄有神明稱正統
甲子授山西按察司副使時天久不雨詔錄所屬重囚得情
可矜疑者五十餘人悉奏釋之又上邊務數十事多見採納
丙寅從廷推徵詣京師拜都察院右僉都御史巡撫四川討
松潘番受命卽行甫踰月而入境申嚴軍法簡練器械築關

堡城池六十四所隋臺三百七十有餘乃進攻賊寨擒渠魁
送京師斬之羣番惴伏獻甲盔刀劍三千餘件良馬四百餘
匹陞左副都御史以母老乞歸養上不許景泰辛未召還番
人請留者凡十有七奏入都勞以羊酒獎諭甚至尋命提督
遼東軍務中貴武臣皆以母撻寇公鋒相戒其屬癸酉海賊
李福作亂深遣都指揮周英捕獲千餘人而械其酋二十餘
人送京師餘盡釋之甲戌俺答入寇深督師拒勦獲敵首七
十餘級馬六百餘匹復上章乞養不許丙子詔還京議事復
固請歸省時母年九十有四矣感風疾不能言深抵家母乃
語曰得覩汝死無憾矣遂死詔奪情起深三疏辭不允天順
改元始獲補請終制再起左都御史率臺臣劾曹欽縱恣不
法事庚辰秋七月二日欽謀不軌遣黨害深于朝房時年六

十有九贈少保諡莊愍子林太學生持喪歸葬廬墓側數年
集宿儒編家記若干卷有免馴廬左鶴巢松柏間人以爲孝

感詔旌其門

唐縣志

楊澤定興人起戎行有勇略以靖難功累陞山西都指揮簽

事永樂中北征有功加都督同知

雍正志

郭璉字時用初名進新安人永樂初以太學生擢戶部主事

明史以勤敏著任福建山東參政

分省人物考

歷官吏部左右侍郎

仁宗卽位命遷詹事府少詹事更名璉宣宗初掌行在詹事

府吏部尙書蹇義老綴部務帝欲以璉代璉厚重勤敏然寡

學術楊士奇言恐璉不足當之宜妙擇大臣通經術知古今

者帝乃止踰年卒爲尙書論以呂蒙正夾袋虞允文材館錄

故事璉由是留意人才識進士李賢輔相器授吏部主事後

果爲名相時外官九年考滿部民走闕下乞留輒增秩復任
璉慮有妄者請覈實從之璉雖長六卿然望輕又政歸內閣
自布政使至知府闕聽京官三品以上薦舉旣又命御史知
縣皆聽京官五品以上薦舉要職選擢皆不關吏部正統初
左通政陳恭言古者擇任庶官悉由選部職任專而事體一
今令朝臣各舉所知恐開私謁之門長奔競之風乞杜絕令
歸一下吏部議璉遜謝不敢當事遂寢正統六年御史曹恭
以災異請罷大臣不職者帝命科道官參議璉及尙書吳中
侍郎李庸等被劾者二十人璉等自陳帝切責而宥之乃令

璉致仕

明史

王驥字尙德東鹿人長身偉幹便騎射剛毅有膽曉暢戎略
中永樂四年進士爲兵科給事中使山西奏免鹽池逋課二

十餘萬尋遷山西按察司副使洪熙元年入爲順天府尹宣
德初擢兵部右侍郎署都察院久之署兵部尙書九年命爲
真正統元年奉詔議邊事越五日未奏帝怒執驥與侍郎鄭
埜下獄尋得釋阿台朶兒只伯數寇甘涼邊將屢失利二年
五月命驥往許便宜行事驥疾驅至軍大會諸將問往時追
敵魚兒海子先退敗軍者誰僉曰都指揮安敬驥遂縛敬斬
轅門並宣敕責都督蔣貴諸將皆股慄驥乃大閱將士分兵
畫地使各自防禦邊境肅然閱軍甘涼汰三之一定更番法
兵得休息而轉輸亦省俄阿台復入寇帝以任禮爲平羌將
軍蔣貴趙安爲副驥督軍三年春偕諸將出塞以貴爲前鋒
而自與任禮帥大軍後繼與貴約曰不捷無相見也貴擊敵
石城敵走兀魯乃貴率輕騎二千五百人出鎮夷間道兼行

三日夜及之禽左丞脫羅斬首三百餘獲金銀印各一駝馬
兵甲千計驥與禮自梧桐林至亦集乃禽樞密同知僉院十
五人萬戶二人降其部落窮進黑泉而趙安等出昌甯至刁
力溝亦禽右丞達魯花赤三十人分道夾擊轉戰千餘里朶
兒只伯遠遁論功貴禮皆封伯而驥兼大理卿支二俸尋召
還理部事久之麓川之役起麓川宣慰使思任發叛黔國公
沐晟討之不利道卒以沐昂代昂條上攻取策徵兵十二萬
人中官王振方用事喜功名以驥可屬思大舉驥亦欲自效
六年正月遂拜蔣貴平蠻將軍李安劉聚爲副而驥總督軍
務大發東南諸道兵十五萬討之刑部侍郎何文淵侍講劉
球先後疏諫不納瀕行賜驥貴金兜牟細鎧蟒繡緋衣朱弓
矢驥請得以便宜從事馳傳至雲南部署諸將遣參將冉保

由東路趨孟定大軍由中路至騰衝分道夾擊是年十一月
與貴以二萬人趨上江圍其寨五日不下會大風縱火焚柵
拔之斬首五萬餘又進自夾象石渡下江通高黎貢山道閏
月至騰衝長驅杉木籠山賊乘高據險築七壘相救驥遣參
將宮聚副將劉聚分左右翼緣嶺上而自將中軍奮擊之賊
大潰乘勝至馬鞍山踰月抵賊巢山陡絕深塹環之東南面
江壁立不可上驥遣前軍覘賊敗其伏兵賊更自間道立柵
馬鞍山出大軍後驥戒軍中勿動而令都指揮方瑛以六千
人突賊寨斬首數百復誘敗其象陣會東路軍冉保等已合
木邦車里大候諸生軍破烏木弄戛邦諸寨遣別將守西峩
渡防賊軼刻期與大軍會驥乃督諸將環攻其七門積薪縱
火風大作賊焚死無算溺江死者數萬人思任發攜二子走

孟養獲其虎符金牌宣慰司印及所掠騰衝諸衛所印章三十有奇犁其巢穴留兵守之而還明年四月遣偏將討維摩士司韋郎羅郎羅走安南俘其妻子傳檄安南縛之以獻五月師還帝遣戶部侍郎王質齋羊酒迎勞賜宴奉天門封推誠宣力武臣特進榮祿大夫上柱國靖遠伯歲祿千二百石世襲指揮同知賜貂蟬冠玉帶思任發之竄緬甸也其子思機發復帥餘衆居者藍乞入朝謝罪廷議因而撫之王振不可是年八月復命驥總督雲南軍務帥參將冉保毛福壽以往未至而思機發遣弟招塞入貢緬甸亦奏獲思任發要麓川地朝廷不納其貢且敕驥圖緬甸驥因請濟師八年五月復命蔣貴爲平蠻將軍調土兵五萬往發卒轉餉五十萬人驥初檄緬甸送思任發緬甸人陽聽命持兩端是年冬大軍逼

緬甸緬人以樓船載思任發覘官軍而潛以他舟載之歸驥
知緬人資木邦水利爲唇齒且慮思機發將以獻其父故仇
之故終不肯獻思任發驥乃趨者監破思機發巢得其妻子
部落而思機發獨脫去明年召還加祿三百石命與都御史
陳鑑巡延綏甯夏甘肅諸邊初甯夏備邊軍半歲一更後邊
事亟三年乃更軍士日久疲罷又益選軍餘防冬家有五六
人在邊者軍用重困驥請歲一更當代者以十月至而代者
留至來年正月乃遣歸邊備足而軍不勞帝善其議行之諸
邊當是時緬人已以思任發來獻而思機發竊駐孟養地屢
遣使人貢謝罪中外咸願罷兵振意終未慊要思機發躬入
朝謝沐斌帥師至金沙江招之不至諭孟養執之以獻亦不
聽命於是振怒欲盡滅其種類十三年春復命驥總督軍務

宮聚爲平蠻將軍帥師十五萬人往明年造舟浮金沙江蠻人柵西岸拒守官軍聯舟爲浮橋以濟拔其柵進破鬼哭山連下十餘寨墜溺死者無算而思機發終脫去不可得是時官軍踰孟養至孟邨海地在金沙江西去麓川千里自古兵力所不至諸蠻見大軍皆震怖而大軍遠涉驥慮饋餉不繼亟謀引還時思機發雖遁匿而思任發少子思陸復擁衆據孟養驥度賊終不可滅乃與思陸約立石表誓金沙江上曰石爛江枯爾乃得渡遂班師驥凡三征麓川卒不得思機發議者咎驥等老師費財以一隅騷動天下而會川衛訓導詹英抗疏劾之大略謂驥等多役民夫昇綵繪散諸土司以邀厚利擅用腐刑詭言進御實充私役師行無紀十五萬人一日起行互相蹂踐每軍負米六斗跋涉山谷自縊者多抵金

沙江徬徨不敢渡既渡不敢攻攻而失都指揮路宣翟亨等
俟賊解多捕魚戶爲俘以地分木邦緬甸掩敗爲功此何異
李宓之敗而楊國忠以捷聞也奏下法司王振左右之得不
問而命英從驥軍自效英知往且獲罪不去當是時湖廣貴
州諸苗所在鋒起圍平越及諸城堡貴州東路閉驥至武昌
詔還軍討苗會英宗北狩羣臣劾王振並及驥以驥方在軍
且倚之平苗置弗問命佩平蠻將軍印充總兵官驥還命總
督南京機務其冬乞世券與之南畿軍素偷惰驥至以所馭
軍法教之于謙弗重也朝廷以其舊臣寵禮之三年四月賜
敕解任奉朝請驥年七十餘躍馬食肉盛聲伎如故久之石
亨徐有貞等奉英宗復辟驥與謀賞稍後上章自訟帝乃官

祥指揮僉事而命驥仍兵部尙書理部事加號奉天翊衛

誠宜力守正文臣光祿大夫餘如故數月請老又三年乃卒
年八十三贈靖遠侯謚忠毅傳子瑞及孫添添尙嘉善長公
主再傳至孫堇嘉靖初提督三千營協守南京還掌左府久
之佩征蠻將軍印鎮兩廣廣東新甯新興恩平間多高山叢
箐亡命者輒入諸徭中吏不得問衆至萬餘人流劫高要陽
江諸縣官軍討之輒失利二十五年春瑾與巡撫都御史談
愷檄諸路土兵誅其魁陳以明悉平諸巢捷聞加太子太保
而扶黎葵梅諸山洞馮天恩等據險爲寇者亦數十年瑾復
督軍分道進勦破巢二百餘復以功廕一子錦衣百戶言官
劾其暴橫召還爵傳至明亡乃絕

明史

田禮字敬思清苑人以廕官右都督同靖遠伯王驥征雲南
孟養又討貴州苗賊戰香爐山寨七戰七勝諸苗請降禮撫

綏有道所至德之雍正志

趙敬字主一清苑人永樂九年舉人授廬州府推官以明允

聞擢御史歷官山西按察司副使政令嚴肅尋上疏乞休敦

孝友睦族姻交際一出於至誠卒之日鄉人痛哭流涕焉清苑

縣志

馮珪字廷玉安肅人永樂十二年舉人授南京理問折獄詳

明陞行太僕寺丞禁革奸弊馬大蕃息擢太僕卿致仕分省人物

考

李福字伯貞定興人永樂十二年舉人授御史謇諤有聲會

承天門火謫榮陽縣以清簡著遷後府都事宜德中改大理

評事正統中遷山西按察僉事奸吏望風解組秩滿乞骸當

途重其才請留之福已飄然歸矣為御史時曹文忠龜以太

和尉督部匠至京欲試禮部格於例泣長安市福一見奇之
曰公輔器也爲言於朝得雋第二人廷試第一人服其識子
俊孫翔鳳鳴鳳皆有福風曾孫高舉成化十年鄉試知大同
縣卒官貧無以殮從孫文深與高同舉抗志隱居發明易理
爲學者所宗

定典
縣志

王哲清苑人性至孝舉永樂十五年鄉試擢御史按遼東江
西河南所至有聲累遷湖廣左布政司廉正嚴明人不敢干
以私民爲作歌曰王捕虎最執古心無私人不苦囊無錢衣

有補

分省人
物老

李敏字好學新安人永樂十五年舉人宣德四年除鳳陽府
同知有惠政累陞戶部左侍郎總督蘇松糧儲巡撫應天等
府景泰五年夏大水敏疏濬青墩浦橫瀝塘五十六里以通

白茆鑿三堰引水通鮎魚口決海口淤塞鋤叢葦千餘畝於

是水得歸海民患以蘇陞戶部尙書致仕

分省人物考

王文字千之初名強束鹿人永樂十九年進士授監察御史

持廉奉法爲都御史顧佐所稱宣德末奉命治彰德妖賊張

普祥獄

明史

普祥於會受一飯一茶者悉簿記姓名有司欲按

簿誅之文焚其簿

畿輔人物考

還奏稱旨賜今名

明史

南畿富民周

固山以私債殺人當死而乞詣大同納粟三十萬以贖詔廷

議文正色曰祖宗定律殺人者抵命可貪三十萬糧而廢法

乎獄遂定

畿輔人物考

英宗卽位遷陝西按察使遭父憂命奔喪

起視事正統三年擢右副都御史巡撫甯夏五年召爲大理

寺卿明年與刑部侍郎何文淵錄在京刑獄尋遷左副都御

史九年出視延綏甯夏邊務劾治都督僉事王禎都督同知

黃真等罪邊徼爲肅明年鎮守陝西平涼臨洮鞏昌饑奏免其租進左都御史景泰改元召掌院事文爲人深刻有城府面目嚴冷諸御史畏之若神然中實柔媚初按大理少卿薛瑄獄希王振指坐瑄死至是治中官金英縱家奴不法事但抵罪給事中林總等劾文下獄尋宥之三年加太子太保時陳鑑鎮陝西將還文當代諸御史交章留之乃改命侍郎耿九疇南京地震江淮北大水命巡視偕南九卿議上軍民便宜九事又言徐淮間饑甚而南京儲蓄有餘請盡發徐淮粟賑貸而以輸南京者輸徐淮補其缺皆報可是時陳循最久任好剛自用高穀與循不相能以文强悍思引與共政以敵之乃疏請增閣員循舉其鄉人蕭維禎穀遂舉文而文得中官王誠助於是詔用文尋自江淮還朝改吏部尙書兼翰林

院學士直文淵閣二品大臣入閣自文始尋遭母喪奪哀如前文雖爲穀所引而穀遲重循性明決文反與循合而不附穀其後以子倫故欲傾考官又用穀言而罷由是兩人卒不相得五年三月江淮大水復命巡視先是蘇松鎮四府糧四石折白銀一兩民以爲便後戶部復徵米令輸徐淮凡一百十餘萬石率三石而致一石有破家者文用便宜停之又發廩賑饑民三百六十餘萬時年饑多盜文捕長洲盜許道師等二百人欲張其功坐以謀逆大理卿薛瑄辨其誣給事中王鏞乞會廷臣勘實得爲盜者十六人置之法而餘得釋還進少保兼東閣大學士再進謹身殿大學士仍兼東閣初英宗之還也廷臣議奉迎禮文時爲都御史厲聲曰公等謂上皇果還也先不索土地金帛而遽送駕來耶衆素畏文皆愕

然不決而罷及易儲議起文率先承命景帝不豫羣臣欲乞
還沂王東宮文曰安知上意誰屬乃疏請早選元良以是中
外宣傳文與中官王誠等謀召取襄世子英宗復位卽日與
于謙執於班內言官劾文與謙等謀立外藩命鞫于廷文力
辯曰召親王須用金牌信符遣人必有馬牌內府兵部可驗
也詞氣激壯逮車駕主事沈敬按問無迹廷臣遂坐謙文召
敬謀未定與謙同斬于市諸子悉戍邊敬亦坐知謀反故縱
滅死戍鐵嶺文之死人皆知其誣成化初赦其子還尋復官
贈太保諡毅愍倫改名宗彝成化初進士歷戶部郎中出理
遼東餉中官汪直東征言宗彝督餉勞擢太僕少卿宏治中
累官南京禮部尙書卒諡安簡

明史

楊瓚蠡縣人永樂末進士知趙城縣課最超擢鳳陽府正統

十年命舉治行卓異者瓚及王懋葉錫趙亮等與焉鳳陽帝鄉勳臣及諸將子孫多犯令瓚請立戶長稽出入由是始遵約束瓚言民間子弟可造者多請增廣生員母限額禮部採讚言考取附學天下學校之有附學生由瓚議始推浙江右布政使與鎮守侍郎孫厚貞共平陶得二之亂景泰二年瓚以湖州諸府官田賦重請均之民田賦輕者而嚴禁詭寄之弊詔與原貞督之田賦稱平久之卒官

明史

張哲蠡縣人永樂二十二年進士任太理評事有寡婦曾氏私與人通忌其子乃誣以不孝繫獄哲疑之後數日令獄卒出別囚屍僞言于母曰汝子已死汝來收掩密令人伺其母竊與一人喜笑卽併捕訊之果服辜子得免死平冤獄胡景先等一十三人俱奏免歲久旱是日雨時以爲雪冤所感陞

江西按察司僉事適有寇葉宗流等竊發山東敕哲同都督楊洪統軍盪平之獻捷上賜金帶陞巡撫雲南僉都御史分省

人物考

陳忠新城人永樂間善造槍礮諸器以討交趾功授新添指

揮同知正統時叛苗攻城偕其子率眾堅守城賴以全貴州通志

崔忠唐縣人永樂間嵐縣典史居官九年廉聲卓著山西通志

邊靖慶都人太學中諸生大清一統志除廣甯衛經歷性至孝父

沒哀毀幾絕及葬負土成墳廬墓六年環植以樹歲旱不雨

靖日汲水灌之俄有泉湧出道旁灌溉克給事聞詔旌其閭

雍正志

吳祥蠡縣人永樂中知嵩縣為政寬和逋民自歸者二百餘

戶縣有猛虎劫賊為害祥齋肅禱神未踰歲獲虎二十餘賊

黨亦各散去邑內遂安秩滿當去吏民詣闕奏留上許之在

任三十二年卒

分省人
物考

何翕安州人永樂中由監生任武陟令寬仁愛人導民孝弟

力田捐俸助不能婚喪者考滿民走闕留之加通判俸仍管

縣事涖政十八年以賢能第一擢御史雪冤獄甚多尋致仕

分省人
物考

谷俊安州人永樂間貢生授冠縣令有能聲改項城河水為

患俊奏遷縣治舍危就安民德之後以王事卒

保定府志

何貴高陽人永樂間授長清丞以仁愛著聲邑多積逋貴設

法勸催輸者立至有冤獄輒為剖白視民事如已事以憂歸

千餘人赴闕奏保許復任載長清志

高陽縣志

王瑾安肅人宣德四年舉人知咸陽縣鋤強植善興學勸農

丁外艱歸民思不置陳於上特旨奪情視事尋以秩滿新尹
來代民猶不忍其去復陳於上特晉六品秩留任二年擢延
安知府九載考滿撫按各具軍民請留狀詔允之加三品秩
陞河南布政使卒

雍正志

宋傑字廷英定興人宣德五年進士除兵科給事中歷光祿

少卿

定興縣志

正統七年安南王麟卒詔傑偕兵科都給事中薛

謙冊封其子濬為王

明史

尋巡撫陝西贊甘肅軍務天順間以

事左遷成化初擢右都御史巡撫蘇松

定興縣志

蘇州府邢宥嚴

而不苛傑薦於朝詔加浙江左參政仍理府事賜璽書居半

歲遂以右僉都御史代傑巡撫傑撫蘇凡二年罷去

明史

傑敷

歷中外垂四十年壁立不阿屢為權倖所擠傑亦安之祀鄉

賢祠

定興縣志

孟鑑博野人宣德八年進士擢吏科給事中持節封王饋遺

一無所受陞都給事中拜戶部左侍郎海寇黃蕭養攻沒廣

東州縣圍廣州鑑奉命參總戎務以五騎從入廣州城時城

閉已兩月矣薪穀騰貴人心洶洶鑑下令開門聽民出入賊

乞降鑑知其詐嚴兵以待賊果率眾圍城鑑選精銳擊賊遂

獲黃蕭養傳首京師餘黨悉平分省人詔以鑑代楊信民巡

撫廣東傳維麟景泰朝召還尋奉命督理山西邊儲湖廣軍

餉所至有功謝政年餘復起南京工部左侍郎數月卒分省人物

考

馬恭唐縣人由正統二年舉人除御史正統八年奉命往陝

西巡邊尋又奉命協贊延綏等處軍務九載任滿陞都察院

右僉都御史仍理前事景泰二年以殺賊功陞右副都御史

恭在邊十餘年軍政修明下人悅服以老疾致仕

陝西通志

劉慶字本善新城人父普安隨王師征討有功朝廷報之以

官不受歎曰五世業儒安事兜鍪為也遂棄歸田里教慶讀

書慶沉毅淵默不肯脂韋世俗少遊學河間既成瀛鄭之士

斂手避其鋒舉正統丁卯鄉薦卒業成均授御史成化改元

兩廣弗靖廷議命文武兼備御史往大司馬白圭以慶請行

比至廣賊鋒甚銳慶出奇決勝未兩月而功成班師之日行

李蕭然陞大理寺右少卿年五十有八卒

分省人物考

李俊字文英定興人以明經薦擢御史正統十三年敕董浙

江銀治處州盜起俊督兵剿捕賊散去明年賊復合攻處州

城空無備俊誓眾死守命善泗者潛出調兵水陸夾攻大破

之

雍正志

而憾俊者以賊反間書誣奏俊疏辯敕勘得釋

定興縣志

擢山西按察使屢雪冤獄以忤執政歸

雍正志

樊忠安州人少有勇力選充護衛將軍正統十四年土木之變上被圍太監王振猶與上對弈忠以所持金瓜捶振死乃

護駕突圍捶百餘人力屈死於陣墓在板橋村

安州志

黃鍾慶都人自鍾以上六世同居正統間旌

雍正志

吳麟清苑人景泰元年舉人由中書陞德府左長史性孝友

樂施予父疾嘗糞以驗安危所得俸祿悉散宗族歲荒罄家

貲易粟以濟貧乏故鄉里婦人子女皆知吳中書

分省人物考

賈俊字廷傑東鹿人景泰元年舉人入國學授山西道御史

歷山東按察副使超遷左僉都御史巡撫甯夏任使悉當邊

陞以甯召爲工部右侍郎奉敕賑饑河南多所全活尋轉左

畿輔諸王府第塋墓悉官予值而儀仗時繕修俊言王府

人物考

既有祿米莊田請給半值儀仗非甚敝不得煩有司報可宏
治四年中官奏修沙河橋請發禁軍二萬五千及長陵五衛
軍助役內府寶鈔司乞增工匠時浙江及蘇松諸府方罹水
災而織造錦繡至數萬匹俊皆執奏寢之工費大省

明史

遷南

尙書太廟夾室成加太子少保以足疾四上疏乞休三年卒
俊歷事三朝始終一節宦官汪直權傾中外俊獨與之抗禮
直百計傾陷竟莫能動孝廟欲建水亭俊三上疏寢其事太
監李廣跪奏曰此老可罷也上怒曰彼爲朕節用耳汝何敢
出此言以靴尖踢落其一齒俊聞之累上疏乞休再出溫旨
慰留其直節勁氣蓋受知於孝廟者深矣

畿輔
人物考

李宏蠡縣人景泰二年進士任御史素行清介難干以私有
奸犯納金於袋而自署其姓名於中置察院中溷壁宏登廁

見之宣示於衆如法按治廉聲大著

蠡縣志

呂雯字天章安州人舉景泰四年鄉薦成化初選御史數直諫有聲累遷右僉都御史巡撫延綏有敵警衆議未決雯獨曰敵既深入宜堅壁待之彼無所獲必困而歸歸則以勁兵邀其後可以得志果如其言有白金文綺之賚築邊牆三百餘里敵不得闌入人資以安山陝饑榆林獨熟流民集者甚衆雯多方綏戢所活不可勝計雯精象緯祿命之數多奇驗

召爲兵部侍郎卒

分省人物考

楊宣字振之新城人景泰五年進士授御史天順初年上疏請戮太監曹吉祥朝論壯之成化初陞鴻臚寺正卿時捕荆襄亂民劉千斤餘黨株連甚衆宣疏請重人命開釋無辜上嘉納賜御製連環詩一首一統志通鑑各一部陞禮部右侍

郎卒賜祭一壇祀鄉賢

新城縣志

孟淮博野人景泰五年進士官河東鹽運使請如淮浙之例

命御史監臨積弊一清

山西通志

侯瓚雄縣人景泰五年進士授戶部主事奉命視湖廣饑奏免積逋八十餘萬石民困以蘇歷員外郎出守鳳翔賑饑流移全活甚衆九載陞山西參政歷僉都御史巡撫甘肅時有哈密之變瓚召赤斤蒙古二衛授以方略克復八城俘馘千五百餘兵部奏聞降璽書嘉諭賜金幣陞南京工部尙書轉兵部參贊機務致仕卒子觀字士賓成化十四年進士授登封令有豪猾父子濟惡人以虎目之觀廉得其情置之法積害頓除十八年大旱繼以瘟疫觀禱於中嶽願以身贖移時大雨如注病者以起歲亦大熟二十年復旱觀發倉賑貸部

使者交薦之以治行異等徵時父瓚爲兵部侍郎例不得任御史乃授戶部主事宏治二年淮徐大水奉命往問百姓疾苦奏免其租稅有差累遷戶部尙書致仕卒贈太子少保賜

祭葬

分省人物考

程章保定人景泰中以監生知渭南縣九年遷平定州同知

邑民服其明敏剛果思之不置

陝西通志

韓文字貫道新城人天順元年進士授行人擢給事中使琉

球嚴禮度屏苞苴遷戶部郎中畿內山東大水疏陳便宜十

事擢陝西參議岷番作亂出奇兵勦之進右布政使權茶易

米以備儲蓄得二十餘萬石陞右副都御史巡撫甯夏留心

邊事有司奏令捕虎疏請止之已而乞休致命給驛歸

分省人物

考

王道彞縣人天順元年進士授行人遷戶部郎中時荆襄山
谷間流民作亂道議立郡縣編戶口衆遂帖然擢副都御史
巡撫鄖陽流民野王剛復亂討平之劾宗室擾民及荆藩諸
不法事時論皆躓之

分省人
物考

黃縉安州人天順元年進士授戶科給事中多所建白而性
狷介毫髮不苟人有饋謁者皆嚴拒之擢江西參政乞歸隱

鄉村布衣蔬食如儒生

分省人
物考

李鳴鳳定興人天順八年進士授刑部主事盡心治獄雖權
倖必嚴鞫或動以危言弗恤也出知太原府有富人某育從
子爲嗣尋以不檢逐之而其夫婦竟爲其從子所弑有司逮
富人妾繫獄歷四五年不能決鳴鳳廉得之擒其從子一訊
而服妾乃得免

分省人
物考

吳欝博野人天順八年進士由禮科給事中歷遷陝西布政使條陳救荒數策皆見採納擢湖廣巡撫德威並著總督南京糧儲以疾致仕欝性孝而好施嘗捐資修學校造祭器建橋梁修道路市藥餌以濟時疫鄉人德之

分省人物考

馮貫字大用蠡縣人會祖守道元西臺御史貫少起田畝年十八始自奮於學貧無膏燭每挾冊隨月光以讀天順八年成進士授御史出巡邊關成化中上疏言時事曰慎爵賞卹窮民處流移修兵政廣儲蓄禁盜賊平刑獄息邊患節冗費重職憲凡十事上嘉納之及掌三法司治山西妖民劾兵部大臣不法事進大理寺卿法律精明持心仁恕嘗曰大理平天下獄獄之不平咎在誰執故當奏讞必反覆訊鞫無憾而後已每廷議參酌得宜其言載在條例有司至今遵行之常

應詔舉所知衆稱得人宏治六年拜南京工部尙書致仕卒

分省人
物考

曹臻安州人登天順八年進士授監察御史按山東先是濟

甯郡縣河流淤塞民饑爲盜臻至疏水下洩民得稼穡盜聞

風解去擢湖廣按察司副使鄖陽巨賊據險叛亂臻奏立鄖

陽府縣卒於官

分省人
物考

王廷器容城人天順時知清平縣廉明仁愛民感其德久而

不忘

由東
通志

白旻保定人天順時爲陽信縣丞持守公廉杜絕私謁撫流

移賑貧乏培養士子政聲卓著值本縣令缺縣民詣闕奏請

以旻爲令上許之操行益堅歷五年擢刑部員外郎

山東
通志

梁宗字廷玉蠡縣人成化元年舉人知榆次縣貌古樸言訥

聃不出口而強毅有爲治具舉舉祀名宦祠

山西通志

張謙清苑人成化二年進士授禮科給事中慷慨敢言而絕

不毛舉細故狀貌挺特憲宗每屬目焉奉命勘事兩廣以執

法稱歷遷南京太僕寺卿上馬政四事悉允行卒官賜葬祭

清苑

縣志

劉瑀蠡縣人成化二年進士授御史按陝西以整峻稱出爲

蘇州知府以簡靜鎮驕奢風俗爲之一變擢山西參政賑饑

緝盜民賴以安累遷都御史督南京糧儲凡巨猾積弊釐革

殆盡

分省人物考

張勛字季常完縣人成化十一年進士知清平縣有異政

完縣志

時河水屢溢勛增高舊隄水患遂息壇廟庠序均煥然一

新士民感之

山東通志

陞戶部主事累官右副都御史甯夏巡撫

致仕年六十有九以疾卒上遣官致祭命有司治葬事完縣志

劉瓚清苑人成化十一年進士知蒲臺縣建廟學開荒蕪勸

耕織民安其業旁邑民將謀盜境內未行輒捕之人以為神

擢御史尋調知襄垣縣歲饑勸富民出粟以賑清苑縣志又令採

橡實煮食分省人物考民賴以蘇復建社倉貯粟四萬餘石以備

荒歉陞知壽州百姓攀轅泣送如失慈母清苑縣志

張貫蠡縣人成化十一年進士授河南知縣慈祥樂易民愛

戴之累遷陝西按察司僉事整軍經武邊陲晏然宏治戊午

哈密犯順貫出師平之賜綵幣擢貴州按察使以忤逆瑾遷

參議尋起右副都御史巡撫遼東謹烽火明斥埃兵馬芻粟

城隍墩堡率有成效賜璽書加二品俸蟒衣三襲卒於官分省

人物考

齊壽蠡縣人成化十三年舉人知馬邑縣禁戢兇徒撫安善

類民以才守兼優稱之

山西通志

徐鵬清苑人性至孝七歲喪母哀毀如成人其繼母之卒也

方應京兆試於八月八日聞諸道途僉以詞不足據相寬解

鵬竟即日奔喪還再事繼母一如所生登成化戊戌進士選

庶吉士授編修充經筵講官有白金文綺之賜凡衣服玩好

必先以奉父母而後入私室年三十九卒

清苑縣志

李儼字仲威高陽人少攻苦力學成化十四年第進士授南

京戶部主事歷員外郎郎中至山西布政司右參議所至有

聲山西邊餉舊為豪猾乾沒而重困貧民儼盡法繩之遂忤

當事罷官怡然曰我固無愧也儼性耿介雖茗果不妄取而

慈愛有肝膽撫從子及寡姊之子女皆無異已出姻婭中有

孤貧者輒收卹之郎中張倫夫婦卒官儼爲治舍殮迎其息
女畜養之俟其家人至厚資而歸之馬氏孤以母改適郭氏
貲產幾盡爲郭所奪繫獄歲餘不決嚴力白其誣乃得釋年

六十有六卒子師孔七品散官師儒自有傳

高陽縣志

胡昂定興人成化十七年進士知如臯縣政嚴明鄰邑疑獄
者咸質成焉時江淮大饑昂請截蘇松漕以賑全活甚衆累
遷湖南按察司持法不少骫及罷官歸貧無以爲家郡守爲
置別墅於郡南邑人爲作居無廬出無車耕無驢之謠云尋

卒祀鄉賢

定興縣志

朱英博野人成化十七年進士除大理寺評事時山西有疑
獄久不決往鞫得實遷寺正持法公直豪貴嚴憚出知鳳翔

府襄陵王雅敬重之

分省人物考

王寅字敬夫容城人爲諸生時從都御史楊一清遊以愨而有文爲一清所稱成化十七年登進士授大理寺評事有山西豪右犯大辟納金二千求脫寅怒曰胡爲以是加我將執之其人走匿卒如法按治進副卿出爲福建按察司僉事有勦海寇功遷陝西按察副使盡心馬政還收地數萬頃於官陝人稱之有一女子死井中實韓藩支庶因姦不從害之有司誤坐他人獄且具一清廉得其實屬寅按治其家以重賂求免寅竟論如法累遷工部右侍郎專理易州山厰完逋負二十餘萬改戶部刑部以疾乞歸卒

分省人物考

劉大甯字汝功完縣人侗儻有大志恂恂雅飭博極羣書尤邃太極圖說以理學名成化十九年領鄉薦授隴西知縣改

廣陵復調安陸皆有政聲

分省人物考

張天衢字叔通高陽人成化二十年進士知豐邱縣有商置布於石後貌而失天衢命昇後貌而鞭之闔門罰入觀者布察所輸布而得盜者人號爲斷石公或殺人而匿其屍久不獲天衢訊時有旋風起迹之得匿屍誅殺人者而開釋無辜人更號斷鬼云擢御史劾秦甯侯張鶴齡上慰諭不問尋奉命訪密雲復偕給事中尙衡覈邊儲覆命時值清甯宮災求言疏請容直臣寬民力罷傳奉恤冤抑戢織造釐鹽漕等政又言都御史王越結太監汪直變亂成法開邊釁先帝特令以左都御史致仕近又夤緣太監李廣以至今職乞仍罷斥以儆官邪李廣罪惡貫盈業已伏辜乃復賜葬祭是褒善之典加於首惡之人何以懲勸近年中外臣工或因言得罪或因事註誤如湯鼐劉槩吉人丁誥皆罪有可宥如楊茂元王

雲鳳武衢何喬新劉大夏林俊曹璘皆才非可棄乞量與拔擢內府甲字庫及京通內外倉等處添設內官乞量爲裁革鎮守太監如臨清李全江西董讓陝西劉瑯四川房懋皆貪酷害民之尤者乞盡行取回以紓民困天下州縣戶口徭役乞行巡撫等官詳察務使均平疏入上曰王越旣用之邊陲矣置勿論餘令所司詳議以聞尋又奏請將因煙火陞遷之程通等十三人建亭之康表等三十餘人五官司厯之皇甫政等七人及平日夤緣李廣轉陞者通行革退宏治六年以後乞陞傳奏匠官之六十八人又冠帶入監之一百二十八人亦請併裁疏入上令逮皇甫政刑部餘姑置勿問尋又疏請罷採兩廣圓眼木直聲震一時以憂歸起山東道御史出爲陝西按察副使駐洮岷以事忤劉瑾謫戍肅州瑾敗釋還

進技察使卒

高陽縣志

傅珪字邦瑞清苑人成化二十三年進士改庶吉士宏治中授編修兼司經周洗馬與修大明會典成遷左中允武宗立以東宮恩進左諭德纂修孝宗實錄時詞臣不附劉瑾瑾惡之謂會典成於劉健等多所糜費鑄與修者官降珪修撰俄以實錄成進左中允再遷翰林學士歷吏部左右侍郎正德六年代費宏爲禮部尙書禮部事視他部爲簡自珪數有執奏章奏遂多帝好佛自稱大慶法王番僧乞田百頃爲法王下院中旨下部稱大慶法王與聖旨並珪佯不知執奏孰爲大慶法王敢與至尊並書大不敬詔勿問田亦竟止珪居閒類木訥者及當大事毅然執持人不能奪教坊司臧賢請易牙牌製如朝士又請改鑄方印珪格不行賢日夜騰謗於諸

閻間冀去珪流寇擾河南太監陸閻謀督師下廷議莫敢先
發珪厲聲曰師老民疲賊日熾以賞罰不當失衆心耳先所
遣已無功可復遣耶今賊橫行肘腋間民騷然思亂禍且夕
及宗社吾儕死不償責諸公安得首鼠兩端由是合疏議罷
上竟遣閻而中官皆憾御史張羽奏雲南災珪因極言四方
災變可畏八年五月復奏四川災因言春秋二百四十二年
災變六十九事今自去秋來地震天鳴雹降星隕龍虎出見
地裂山崩凡四十有二而水旱不與焉災未有若是甚者極
陳時弊十事語多斥權倖權倖益深嫉之會戶部尙書孫交
亦以守正見忤遂矯旨令二人致仕南京言官交章請留不
聽珪歸三年御史盧雍稱珪在位有古大臣風乞頒月廩歲

錄以示優禮又謂珪剛直忠黨當起用吏部請如舊言不報

而珪適卒年五十七遺命勿請卹典撫按以爲言詔廕其子

中書舍人明史子榮字來臨由恩廕累官尙寶司卿清苑縣志謫亳

州同知興學校繕城隄覈倉厰善政甚多安徽通志嘉靖元年錄

先朝守正大臣贈珪太子少保諡文毅明史

楊潭字宗淵別號紫泉新城人成化二十三年進士授刑部

主事獄無冤滯宏治癸丑丁外艱服闋擢光祿寺丞陞少卿

正德初奉命祭告海岳上民瘼四事轉南京大理寺丞魏國

公僕以謀殺人潭廉得之竟置於法改北大理寺進少卿時

逆瑾掌內厰專事羅織潭一奉國法堅執不阿廣甯伯義男

爲其叔毆死瑾坐抵命潭曰縱使親姓孫法且不死矧義男

孫乎不從瑾銜之乃摺摭他事罰穀五百石已擢戶部侍郎

總理倉場會征討流賊改隨軍督餉因請發帑銀分路收糴

復取存留者從權協濟劾山東巡撫張鳳酗酒怠政捕盜都
憲甯杲指揮江彬貪功妄殺併論諸將老師玩寇疏入上嘉
之鳳坐落職餘罰治有差自是諸師始協謀戮力賊平晉階
廢子命督餉宣大陞本部尙書總理倉場人咸服其剛正改
莅部事適甯藩遘變上親征百官景從供應急於星火隨具
取足中外倚之賜羊酒楮幣辛巳夏以老乞骸骨疏再上始

允行甲午卒予葬祭

分省人
物考

丁鳳字應韶蠡縣人成化二十三年進士授戶部主事監督
京通倉及臨清糧斛宿弊一清累遷應天府尹活繫囚百數
轉左副都御史總督南京糧儲奏革冗食軍匠五六千人進
兵部右侍郎正德丙子兼左都御史提督宣大軍務有郤寇

功廢錦衣衛世襲百戶尋致仕

分省人
物考

李春滿城人成化間知西鄉縣時金洋堰遭水衝圮春設法

重修隄岸堅固民沐其惠肖像祀之陝西通志

李勉祁州人成化時知招遠縣祁州志居官三年無一罪人繫

獄山東通志以內艱歸老幼遮道而送之祁州志

王凱蠡縣人宏治三年進士知南陵縣有豪猾殺人以賄免

死七年不決凱執法抵罪擢御史巡紫荆等關號令嚴明按

關陝吏畏民懷陞山西按察副使整飭固原兵備以剛方自

守陞山東左參政未至卒蠡縣志

劉愷字承華新安人宏治三年進士以廉平自勵轉鴻臚寺

丞擢少卿壬申山東盜起廷議以才名素著者護徐充漕運

拜愷右副都御史以行陳便宜數十事上皆俞允乃徵兵扼

險躬率精騎校巡復於河邊築甬道削隄為牆高二丈許綿

亘六百餘里五里一鋪鋪築墩置健卒守哨兵勢大振賊不敢近明年河決黃陵岡詔治河愷相度地形築隄通渠而風甫大作愷乃爲文告河神曰神之禍黃陵者實禍吾民也推召災之由官實爲之愷願伏神誅以代民禱畢雨霽越二日河復故道得腴田數千頃上賜璽書褒之乙亥陞兵部侍郎明年遷禮部尙書武宗南巡九上章請回鑾郊祀禮成賜錦衣一襲加蟒玉世宗御極以疾連章乞休歸三載卒賜祭二壇命有司營葬所著有奏稿及西臯吟等集子靖臣端臣靖臣正德九年進士歷官大理寺正卿屢釋冤獄以議大禮不合謫汝州判端臣正德己卯舉人九上公車不第遂終身不

仕

畿輔人物考

李師儒字宗正高陽人少從吳璟學易遂究河洛淵源宏治

三年成進士由翰林院檢討授宗藩長史不就謫四川布政司照磨遷仁和知縣守汝裕二州時瑾黨橫行郡邑官皆望風下拜師儒長揖而已擢郎中分管河道稅屏羨金不取分巡臨清大賈汪信闖門爲兩備所劫而泯其迹不可按師儒曰安有禍及主翁而兩備獨存之理一詰得實境內稱神陞

山東參政致仕

高陽縣志

張宦字惟臣完縣人宏治六年進士官戶科給事中忤劉瑾

落職瑾誅復官終陝西行太僕寺卿

完縣志

所在有冰蘖聲

分省

人物

子敕字汝欽嘉靖己丑進士擢御史以言事忤旨罷官

隆慶三年錄先朝直臣起太常寺少卿尋致仕卒

完縣志

馮蘭蠡縣人宏治六年進士授吏部稽勳司主事遷文選司

郎中守法奉公人不敢干以私累遷工部左侍郎總理易州

山厥以清慎公勤受特恩加蟒衣三襲卒嘉靖改元贈通議

大夫

分省人
物考

韓春蠡縣人宏治六年進士授睢甯知縣時大旱春自責請
禱大雨三日劾平江伯擾民罷之擢北臺御史痛革時弊督
修皇陵劾宦官李興條陳六事賜衣一襲銀五十兩陞山東

按察司副使逆瑾用事以剛羅禍遂歸

分省人
物考

宋連字汝器清苑人宏治八年舉人任樂陵教諭擢御史巡
視中城鞫金牌鐵劄之獄名重當時奉特旨經略三邊時逆
瑾黨以邊事廢帑金鉅萬連疏請誅瑾而治其黨越日瑾敗
武宗稱連爲真御史巡按關中墨吏皆望風去釋被瑾誣者
幾百人因諫遣歸世宗卽位起湖廣僉事調榆林散羨金萬
餘給軍士榆人感之立生祠焉陞西甯副使番漢皆安加參

政致仕卒詔入鄉賢仍建家廟給丁奉祀守墳

清苑縣志

李棠清苑人宏治八年舉人授通判正德中知汾州府慷慨

有大節清苑縣志甘澹泊善理煩治劇山西通志歷松江太原同知擢

戶部郎中及歸貧不能自養沒不能葬里人相率助之且為

立清官碑焉清苑縣志

鄭陽字宗乾安肅人聰慧過人宏治九年成進士知夏津縣

躬節儉振頽敝刑清政舉擢御史巡按河南劉瑾納賂奪民

田以與宗藩陽執法拒之遂繫獄左遷主簿瑾伏誅累遷陝

西巡撫風紀肅然武宗西巡陽督餉於邊毅然區畫事濟而

人不擾有蟒衣環帶之賜葭州盜起討平之贈三世如官尋

致仕分省人物考

郁琛清苑人宏治十一年舉人正德末知洛川縣劬豪猾郵

士民邑人畏而愛之祀名宦祠陝西通志

魏彥昭容城人宏治十二年進士由行人擢御史以忤逆瑾

謫利津丞有禦流賊功累官至參議畿輔人物考

劉錦螽縣人舉宏治十四年鄉試知華州時商山有虎為患

錦教民捕虎屢獲之民賴以安山東盜逼潼關錦督眾巡守

盜不敢犯修撰呂柟為製詞勒石焉以忤鎮守中官被誣繫

錦衣獄二載餘削籍放歸嘉靖改元起湖南武岡州戍卒素

驕悍憚錦威稜俱相戒歛戢士民為立生祠螽縣志

仇惠字澤民新安人宏治十五年進士知蕭縣誓不取一文

錢吏畏民懷擢御史巡按山西所作教民榜勸善勸農文曲

盡閭閻情狀疏劾逆瑾謫滁州判官後知泗州陞山西按察

司僉事卒於官惠在蕭時為郵刑郎韓某所窘辱及按晉而

韓爲潞安守惠首薦者三比卒韓爲晉制府厚報之爲歸糶

畿輔
人物考

郭鳳清苑人宏治十七年舉人授荊州通判改萊州同知盡

心賑饑活民數萬監稅德州餘銀三千悉歸公帑遷戶部郎

中出爲夔州府愛民如子而尤勤課士士民立石頌德鳳命

仆之尋致仕

清苑
縣志

石宗岱字岳山清苑人宏治十八年進士知歷城縣慈祥愷

悌以逆瑾擅權索賄弗與遂罷歸瑾誅起知褒城縣遷衛輝

通判致仕鰥居杜門三十餘年郡縣者罕識其面

清苑
縣志

王堯封字伯圻定興人宏治十八年進士授襄陽府推官

定興

縣志操履嚴正讞獄詳明擢御史按兩浙有聲累官戶部尙書

致仕復起南京兵部尙書卒祀鄉賢

定興
縣志

再繼志蠡縣人宏治十八年進士知餘杭縣興學校禁師巫

邑大治擢都察院經歷以忤逆瑾下獄尋授長子令歲旱祈

雨輒應邑人爲樹德政碑累官至苑馬寺少卿

蠡縣志

李緯字汝靜唐縣人正德三年進士授御史有氣節居官不

滿歲上諫疏幾百忤逆瑾謫揚州推官卒以疏稿殉葬

唐縣志

張紹烈字孟晦一字希古容城人爲諸生師事李伸伸沒廬

於墓側以終心喪慕劉靜修之學日誦其遺文以自樂宏治

中以布衣詣闕上疏請潔牲牛御經筵抑奔競毀淫祠修馬

政切中時弊孝宗允行之正德初疏請斥宦官番僧武宗爲

優容賜冠帶榮身京師好事者繪爲獨諫圖逆瑾用事紹烈

又上疏千餘言詔下獄數日釋歸七日

雍正志

與生徒輩講易

厲熏心一爻衣冠正坐而卒

畿輔人物考

平生所藏書籍不火自

焚遠近莫不歎異

雍正志

田蘭字世馨清苑人父昭官福建鹽運司副使以廉潔稱蘭登正德三年進士授御史以劉瑾索賄不獲出知蒙陰縣政寬平調固始創立城池不費官帑民德之遷大同府時戍卒以缺糧戕官人情洶懼蘭多方處給反側以安尋以病告歸

卒

清苑縣志

王德明字宗周清苑人父恩官山陰縣歲饑請發粟以賑上官吝不多發恩曰古有矯制發倉者矧上官耶乃倍數以施上官怒恩遂解組歸泣留者以千數至家遣人送所乘馬還曰此山陰馬也遂壹意課子不與外事德明登正德三年進士知封邱縣

清苑縣志

錦衣衛指揮廖鵬弟倚兄勢凌侮長吏德

明獨不爲禮

雍正志

調嘉善寬糧長之包賠發豪猾之隱稅興

學課士蒐卒練兵遂有桃源之捷清苑縣志當道文移有不便民

者輒停罷之浙江通志遷戶部主事出知懷慶府時連歲旱蝗德

明傾橐散粟全活甚多賜金幣歷太常寺少卿擢都御史巡

撫山西討平石州巨寇忤奸黨被搆罷歸累薦不起卒詔祀

鄉賢并給丁奉祀守墳清苑縣志

石麟字邦瑞完縣人少負異質正德三年成進士官戶部主

事出知太原府卻羨餘千金理冤獄五十有古循良風未幾

乞歸浪迹竹林寄傲詩社年八十四嗜學教子不倦分省人物考

袁宗儒字醅夫雄縣人正德三年進士授御史明史按浙江嚴

禁溺女并戒嫁女家毋過費浙俗一變按河南會河決宗儒

定規畫慎出納民力用蘇是時趙藩軍為居民患宗儒以法

繩之并劾諸輔導官風紀大振長沙知府宋某忤當道將致

大辟上敕宗儒往勘事得白

分省人
物考

十二年冬帝在大同以

郊祀將回鑾既而復止宗儒率同官力諫明年夏孝貞純皇

后將葬帝還京宗儒等復引災異力請罷皇店遣邊兵又諫

帝巡邊語極危切皆不報擢大理寺丞嘉靖三年爭大禮廷

杖厯官右僉都御史巡撫貴州吏部尙書桂萼議宗儒改調

遂解職歸未幾起鄖陽改山東

明史

時厯城章邱有窪田久廢

爲沮洳乃以田數定夫額令鑿渠通河導河流以入海匝月

而就遂成膏腴

分省人
物考

坐屬吏賑饑無術不能覺察罷歸以

薦起左副都御史扈蹕承天還京卒

明史

邵錫字天佑安州人正德三年進士授行人擢吏科給事中

壬申上幸昌平錫疏諫回宮其詞曰臣等於八月初二日伏

聞聖駕於本月初一日出幸昌平平州等處臣等憂惶驚悸莫

知所爲謹將內外守衛官軍不時點閱嚴加防範同科道各官交章上請還宮及出都迎候已逾六日未蒙回鑾中外人心罔不搖抗臣等仰惟陛下身為天地神人之主凡一舉動宗社安危係焉今乃遠出盤遊累日弗返且警蹕不聞嚴衛不設萬一變生不測可爲寒心况宮禁者圻甸之本圻甸者天下之本宮禁甯肅然後圻甸安堵而天下可保無虞故我祖宗貽謀深遠防患周悉出京城以郊祀天地旣委戚臣以守內又設官軍以衛外出內城以大祀社稷時享太廟亦必設官軍以守衛之所以保固根本用絕奸萌皇上繼統遵行于今十有二年矣不意近者忽棄根本重地遠涉荒郊卽今宮闕久虛居守無託兩宮聖慮恆切隱憂九廟神靈何以依妥陛下聰明天縱獨不念及此乎且皇城內外守衛軍士

老弱居多加以玩愒因循漫無警畏及見各門往來人役絡繹冗雜莫從詰辯竊恐覬覦之徒乘機生變其爲宗社之虞蓋有不可言者伏望陛下念祖宗創業之艱思今日繼統之重速命法駕早還宮寢以衍宗社無疆之休以慰中外臣民之望天下幸甚臣等幸甚戊寅上議北征錫疏陳十不可且率科臣遮道泣留

安州志

上怒欲拔劍斬錫太監蕭敬跪奏曰

此忠臣也乃釋之

畿輔人物考

世廟初年有請停迎立封爵劾中

官閻洪梁諫諸疏上皆嘉納歷浙江參議山東布政司一塵不染人以楊伯起比之庚寅擢副都御史巡撫山東秉公執法僚屬憚之勘王府莊田數十頃還之民人復以汲黯包拯擬之居官凡三十年卒祀鄉賢祠

安州志

羅錦滿城人正德五年舉人歷知招遠德平壽陽三縣清介

絕俗德惠洽民保定府志官壽陽二載公庭絕敲扑聲山西通志三邑

俱建祠尸祝之保定府志

段棗強完縣人正德七年流賊犯完縣知縣杜瑀率民固守

棗強糾敢死士數人夜劫賊營死保定府志

劉奎耀束鹿人正德八年舉人知太谷縣性嚴重而政尙寬

平民畏愛之如嚴父慈母祀名宦祠山西通志

張效仁字宏甫新安人今併安州正德八年舉人保定府志嘗絕糧五

日而人適以金請囑其僕乘間慫恿效仁曰汝以我絕糧故

欲敗我行耶以金迎面而擲之人稱其居爲夷巷云知芮城

縣持已狷介而布政寬仁以艱歸起兩淮鹽運使通判甘心

窮約講學自娛卒祀鄉賢保定府志

賈道字會稽束鹿人正德九年進士知益都縣陞戶部主事

監河西務稅廉隅峻潔服則孳孳講學爲士林矜式卒之日

無以爲殮士論高之

東鹿縣志

韓璿字廷佩高陽人正德九年進士授戶部主事屢奉命督運以廉平聞累遷山西按察司僉事分巡遼左妖人李貞掠山海關殺守關主事王冕御史王正宗掩捕得其同謀名冊璿謂正宗曰此不可閱閱之則其黨益堅矣請對衆焚之其黨遂解散貞被擒擢陝西按察司副使整飭洮岷兵備以避謗歸尋以原官整飭威茂威茂在萬山中由疊溪達松番凡五寨皆據險爲亂先是多姑息議撫費繁而衆益驕璿與總兵何卿力主勦累戰皆捷賊負嵎死守璿率衆以鐵錐插石隙中攀緣而上夜襲之賊衆驚潰五寨悉平賊貲以億萬計盡歸朝廷擢湖廣左參政致仕璿居官三十年家無長物以

父不及三釜終身不御羅綺子博嘉靖庚子舉人官文登縣

高陽縣志

宋大本字秉忠新城人績學敦品舉正德十一年鄉試章邱

教諭遷延川縣

新城縣志

革羨餘籌荒政全活甚衆

陝西通志

擢御史

清軍河南巡按雲南等處人稱為真御史

新城縣志

張文全新城人正德十一年舉人知淄川縣有異政士民戴

之祀名宦

保定府志

南壽字仁夫滿城人正德十二年進士授刑部主事抗疏諫

武宗南幸廷杖幾斃嘉靖初擢知徽州府蒞政不阿忤上官

罷歸壽素履質實鄉邑奉為師表

雍正志

呂應祥雄縣人正德十四年舉人知恩縣剛方廉慎既去民

思之為勒石

保定府志

陳謙蠡縣人正德十四年舉人知五臺縣政聲卓著尤盡心

學校陞太原府通判

山西通志

劉恩字以忠高陽人正德十五年進士知寶應縣歲祲恩爲

省浮革冗發倉煮粥活萬餘人陞刑部員外累遷湖廣參議

山寇發恩撫之得脅從男婦數百人同事者議以訊馘告恩

力解之得不死致仕歸祀寶應名宦祠

保定府志

高顯宗字汝孝清苑人正德時以選貢授霍邱知縣邑有巨

猾爲逋逃藪前令弗敢問顯宗廉其罪狀寘於法諸兇屏息

歲大祲緩徭勸賑民賴以全致仕歸

同上

許瑤字一齋定興人正德時諸生嘗隨直指謁文廟天適雨

大聲曰先師前各官不得張蓋問爲誰曰生員許瑤直指領

之於雨中卒事以貢令樂陵有兄弟競產兄賂千金佯納之

及廷鞫呼其弟曰斷千金給汝可乎曰足矣出所賂付之其
兄惶愧瑤徐曰兄弟天倫何不分汝弟而賂官爲在官慈惠
多隱德旣致政以缺資幾不能歸長孫從誠尙世宗嘉善公
主爲駙馬都尉世執金吾贈瑤少保次孫從詡之子顯達天
啟璫禍時魏學伊等主其家力爲之左右元孫代興襲錦衣
廕進都督甲申京師陷被執不屈死妻周氏殉焉

定興縣志

李瑟新城人爲諸生親沒廬墓有枯木生花白蛇繞側正德

中旌

大清一統志

李性字存夫東鹿人嘉靖元年舉於鄉除海豐縣民多逃亡
性招徠復業賦乃足額調淄川邑獷悍好訟以性廉強謹嚴
俗稍變歷東昌同知擢南工部員外董造甲鑄錢與中官多
交涉事性執法秉公中官初惡之而後亦相安督儀眞閘監

蕪湖稅皆一洗相沿陋習商旅便之忤權要謫陝西甯州判
拂衣歸海豐淄川民戴之如父母每裹餼糧至其家問起居

東鹿
縣志

王荔字子巖高陽人有詩名嘉靖元年舉人爲青州推官剛
正不阿上官惡之作詩以自白直指有所索亦以詩答之歷
數年投劾歸爲萬水亭與其弟日相倡和里中人指其宅曰

詩王家

雍正
志

李鳳邠州人嘉靖三年以監生爲象山訓導妻失明伉儷甚
篤其子得遺金於市命還之日坐齋中課諸生肄業督學使
者汪某任意恣睢鳳掀髯厲聲曰斯文宗主何卡急至此言
不可者三同列皆爲股栗

邠州
志

喬英字伯藏東鹿人嘉靖二年成進士授行人兩使藩府力

卻饋遺遷南浙江道御史疏論時政得失凡十數上上皆嘉
納巡按上江有擒妖人虞順勦巨寇朱漢功以疏劾權要下
錦衣衛獄上旋悟詔復其官出爲山西布政司參議累遷陝

西苑馬寺卿乞歸卒

東鹿
縣志

劉道亨字時濟新城人嘉靖五年進士知安陽縣善發奸摘
伏而竟任不登一贖鍰趙藩以百金爲壽峻卻之潞藩之國
道經邑之回龍鎮駐不發道亨以正言相規遂趣駕去省金
錢數千萬緡邑役重多逋而田蕪不治道亨清詭冒減租庸
設法勸耕民皆相率墾荒成熟者無算立常平倉積穀十餘
萬石擢兵科給事中疏諫三王並封其詞曰臣竊見聖諭停
立東宮並建三王且屢援祖訓立嫡不立庶之條以布中外
科部諸臣極力救正未蒙採納臣不勝惶恐謂祖訓之垂炳

若日星明旨之頒信如金石而使陛下牽濡忍之心元良爲久虛之位信義未孚議論滋起是諸臣之爲謀不忠而陛下之於祖訓或未深察也臣恭繹祖訓凡朝廷無皇子必兄終弟及須立嫡母所生者蓋謂藩封入繼明嫡庶以杜窺伺之心若我皇上瓜瓞麟趾振振綿綿豈可援兄終弟及之例此義甚明陛下誠遵祖訓誠慮棄嫡何不取而一玩之也國家元子無封王之條東宮有待嫡之例所以預建元良維繫宗社正名分息爭奪意甚深遠臣伏讀職制篇親王嫡長子年十歲立爲王世子王年三十正妃無嫡子其庶子止爲郡王待後無嫡始立庶長子爲王世子夫言親王而不及朝廷者何藩邸之所繫小而朝廷之所繫大也藩邸有統系而無人民朝廷則萬年宗社四海生靈胥託此焉故王無嫡之長子

可封而朝廷無嫡之元子必不可封王世子之位可虛而皇

太子之位必不可虛煌煌寶訓列聖相承代有建儲往往近

不踰二三齡遠不踰四五齡未聞有久虛以待嫡者元子十

二齡以長陛下乃欲封王待之乎夫祖訓申明如此而陛下

援引如彼此臣未敢爲陛下批鱗而欲先爲祖訓釋疑者也

伏讀聖諭又謂朕爲天下主無端受誣臣愚竊歎陛下有光

明正大之心而不免於人疑也又感服陛下有謙虛兢惕之

心而不安於人言也然所以疑亦有因長幼定序昔年曾言

之今長幼之說忽易而爲嫡庶之說待二十一年舉行去年

曾許之乃冊立之命忽易而爲封王之命王言如絲其出如

綸絲綸之大孰有過於冊立之旨而可若是數易乎然則今

日待嫡之心卽前日待期之心而今日之待嫡反不如前日

待期之猶有期也此人心所以疑也豈惟疑陛下方陛下發
札以託元輔者甚專元輔擬旨以覆陛下者甚密自封王待
嫡之旨一出在朝大小臣工咸不直元輔謂其得罪天下後
世而元輔亦自謂倉卒未及致詳誤有此舉痛自悔恨之不
暇矣夫陛下方倚重元輔而使冒誤國之大罪犯舉朝之公
論則何能一日安其位耶如陛下沉思高皇垂訓之旨續成
列聖率祖之心收回新命一依前旨冊立東宮並封二王如
嘉靖十八年故事則率祖攸行大孝也安全輔臣大仁也昭
播中外大信也一舉而三德備陛下何憚而久不爲此臣尸
素無能慙血有心祖訓具在據經覆陳惟我皇上念宗社大
計將臣所奏敕下閣部會集廷議若臣背訓妄詆雖伏斧鑕
所不敢辭未幾以母憂歸起吏科給事中有敬陳通精神疏

其詞曰竊維君臣相與之際若人一身大君元首也大臣股肱也言官耳目也然必精神流貫於其中而後和氣充溢百骸舒暢方今天下之患多矣臣不爲憂臣所蒿目寒心者在殿陛之間上下猜嫌內外闕隔皇上之所以統馭百官與百官所以承奉者不過形體相攝束而非精神所流貫乖戾漸生政令日壅深憂隱禍有醞釀於中而不覺者矣臣謹具所見爲皇上陳之臣聞宰臣入則參對而議政事出則鑒察而董是非補袞闕理百官以其身任天下之重者也近來紀綱弛而士風壞在朝諸臣不持公心相與惟以私忿相傾爭論紛紛戈矛競起每一事而章十餘上厯數閱月猶不已忠佞混淆賢不肖莫辯其究卒使忠直去而邪佞留朝堂之上是何景象此豈無關於輔臣之責而言孰是非人誰邪正漫然

不一別白也果輔臣坐視而不爲之所耶抑亦嘗言之而皇上不聽耶朝堂若聚訟而輔臣不言則位在端揆而無以裁外廷之曲直佐理謂何輔臣進匡救而皇上不聽則托在心膺而罔與定一時之國是寵秩謂何非輔臣憚天威之難霽而不敢瀆則皇上忽兼聽之爲公而不欲聞也皇上與輔臣精神蓋不相通矣吏部推陞有正有陪而威福出自朝廷正可用則點正正不可用則間或點陪有何不可要在持至虛至公之心以收得人之益耳乃皇上近來因吏部請勿點陪而故左之京堂之推強半點陪吏部左堂吏禮科都給事兩推不補甚至推補原官者亦半載餘弗蒙俞命夫正推不見用則進退維谷任職者不免灰其意氣屢催不得旨則急缺久懸主銓者何所措其手足彼吏部之固執固未爲無罪然

不過拘資俸以明職掌而皇上左之若此則皇上與吏部之精神不相通矣以臣而論固執之失其罪小懲固執之失勢必變而爲詭隨詭隨則仕途濫而其害不可勝言矣皇上可不慮及此耶言官論列有當有否而採擇取自上裁言而當則聽言而不當則弗聽有何不可要在持至虛至公之心以收用言之益耳乃皇上近來因言官愚戇而故抑之言及乘輿者十不一下言及大臣者十不二三下甚至一事而論疏不下辯疏則下一人之言而前疏則下後疏則不下夫言官除諫外別無職業而陳說率多中格何以爲效忠之地事情必並聽乃見曲直批發止據一偏何以服人心之公彼言官之輕言固未爲無罪然不過伸一喙以圖報稱而皇上抑之若此則皇上與言官之精神不相通矣以臣而論輕言之失

其罪小懲輕言之失勢必流而爲不言不言則言路塞而其害不可勝言矣皇上可不念及此耶大抵元首股肱耳目之精神不通則一身病皇上輔臣吏部言官之精神不通則天下病要其所以不通者在輔臣則過於隨在吏部言官則過於激在皇上則過於疑天下國家之公事當以天下國家之公心任之隨與激皆私矣語曰疑人莫任任人莫疑旣簡拔而爲輔臣爲吏部爲言官則疑亦非也茲欲精神之通在諸臣去其所謂隨與激而協恭和衷於下皇上去其所謂疑而開誠布公於上爲輔臣者毋養交毋循衆自完秉公持正以擔當國是而皇上則推誠信任遇大政事間一召對以其成喜起之風爲吏部者毋引嫌疑毋執已見鑑空衡平以公銓選而皇上則推誠委任卽欲一二點陪亦明示以故而無使

有掣肘之歎爲言官者毋急切求勝毋抗訐要名平心易氣以摠忠讜而皇上則推誠茹納卽所言未當亦慨賜批發而無使有挫抑之慮庶幾皇上之精神常通於下諸臣之精神常徹於上宮府一心內外一體交孚固漆和氣自臻天下之患舉不足憂矣此臣愚所謂精神之說也倘蒙皇上採納施行宗社億萬年有道之長端不外是臣不勝悚仄仰望之至其言皆切中時事疏劾輔臣趙志臯及諸曹郎奸貪狀下部分別議處復陳肅吏治五事曰慎推陞罷掣籤嚴京官考察禁被論抗辯酌外官考語報聞吏科給事中戴士衡劾呂坤疏留中道亨疏請檢發其詞曰臣科給事中戴士衡疏論葉夢熊呂坤孫鑛等業奉明旨下部隨蒙皇上遣中使追還乞今未發旬日以來人言嘖嘖賢士大夫扼腕交憤大都謂呂

坤生平人品自有定價其近日建言一疏忠肝義膽天日可鑒卽聖度且賜優容乃士衡指爲罪案然則言官所職何事乎已不肯言又忌人之讜言孫鑛擔當戰守圖之甚力其見忌當事正坐不肯依違觀望耳前日之斥舉朝尙有餘惜士衡何心獨有餘恨雖然言官風聞言事如心本無他卽偶爾誑誤人誰不亮乃士衡原爲新建知縣大學士張位新建人也喜其夤緣阿順納爲幕賓原任吏部尙書孫丕揚與呂坤孫鑛素相善去歲丕揚論位位疑疏出坤手心切銜之故授意私人力圖報復而波及於鑛彼葉夢熊等亦不過與坤作陪客耳疏上之後但有爲坤稱屈者位聞之輒恨此其故可知也自來論劾大臣必其情罪詳確有不察形影不列罪狀揣摩數語了無指據而遂議罷者乎此其故又可知也國事

多艱老成凋謝得一正人君子維持匡救不啻得勝兵百萬
位躡登台輔士衡濫竽言職不聞爲國家進一賢才建一讜
議而冰山相附爪牙相雄此端一啟君子斂足而避讒小人
彈冠而媚竈則其流禍國家夫豈淺鮮臣所聞輿論如此夫
士大夫臧否出於臺諫則爲公論持於部院則爲公道果如
人言則公論業已湮滅全賴部院大臣力持公道爲一別白
乃原疏追還奉行無據毋論反汗非體且何以判人品服人
心使天下後世曉然知清議之可畏也昔科臣李春開持論
不當則使孟麟參駁胡汝甯持論不當則鍾羽正參駁蓋邪
正消長關世道安危古云大義滅親區區僚誼何計乎用是
不避嫌怨謹據輿論上請伏乞皇上將士衡原疏檢發救下
該部院從公勘覆仰候聖斷世道幸甚疏入不報復陳治安

六事又不報久之乃抗疏劾位結黨亂政謫樂清主簿尋擢
尙寶丞未及聞命而卒道亨歷官凡二十七年而在諫垣則
不滿三載疏凡四十餘上讀者謂有陸宣公之風云高陽孫

承宗爲作傳祀鄉賢祠子允嘉邑諸生

新城縣志

王沼字文樂安肅人嘉靖五年進士知滕縣時因饑饉師旅

民多逃亡沼拊循招徠復業者數千家以捕巨寇功取忌調

盧氏尋棄官歸子楓官雞澤訓導慷慨好施鄉閭德之

安肅縣志

王祚保定大甯衛人

案大甯衛今承德府境永樂元年墟其地其民遷保定者卽爲保定大甯衛人

嘉靖八年進士性鯁直任貴州道御史諫沮馬市忤嚴嵩矯

詔廷杖罷歸後徵爲吏科給事中不就卒於家

雍正志

張舜元字伯才望都人嘉靖八年進士知吳縣吳賦甲天下

而邑多豪猾令至每以厚賄相啖而陰持之舜元悉卻諸饋

遺免堂食錢千餘緡及常熟吳江兩邑之供織造工匠等不使侵蝕舜元爲面給物價裁其秬餘清諸巨室田土影射之弊暴橫者悉按治之循聲卓著民肖像祀之擢吏部主事忤權要謫鳳陽府通判有青天之稱徵授戶部主事進員外郎有嚴嵩黨怙勢隱租舜元立限催徵不三月完積逋二十餘萬石遷廣東司郎中兼視七司篆條陳足國十三事及百官優免定例允行忤嵩意出爲河南左參議以慶賀入又不謁嵩遂落職歸自號堯山居士

望都縣志

崔三畏蠡縣人嘉靖八年進士

蠡縣志

任太谷縣有惠政其治

罪人必先以禮曉諭去之日士民遮道泣留厯官四川參政

山西

通志

趙允亨字伯通安肅人嘉靖十一年進士知長安縣勤恤民

隱厯三年路不拾遺士民爲立石識之

陝西通志

行取入都以不

辭長官而去境被都御史劾復改陽穀尋擢太僕寺丞

安肅縣志

何思字慎之雄縣人嘉靖十一年進士除襄陵令政平俗變

民頌之擬擢御史被譖改工部主事遷戶部出知大同府備

兵陽和辯疑獄誅奸僧修邊牆有白金之賜擢大同巡撫上

籌邊三策允行索還叛軍肅芹等復賜金幣以忤權要乞歸

再起南贛巡撫改宣府以疾致仕鄉人有被屈者每密白之

其人或踵門謝輒拒不見

雄縣志

高燿字子潛清苑人嘉靖十四年進士廷對策極言時弊以

二甲除工部主事改吏部擢太僕寺少卿遷光祿寺僚屬忤

中官誣及燿對簿不屈降河南參議累遷南戶部侍郎改北

進尙書前後上十餘疏上皆嘉納隆慶初御史某以蜚語中

之康熙志中官於上前演戲亦每借打諢以陷正人忌耀剛耿

乃昇一病瘡者弄之而相謂曰保定府好膏藥復曰好膏藥

也要錢上聞而重述其言耀遂乞歸畿輔人物考築別業城東隅

種竹蒔花徜徉自適遇里中大利害則侃侃言之康熙志為文

純雅不事校飾所著有太保集藏於家分省人物考里居四十年

年八十五卒子七人孫二十二人多以科目顯為畿南望族

第一康熙志

郭天祿定興人嘉靖十四年進士知永新縣陞御史按山西

宣大等處以親老不即就途謫沂州府僉事至則設方略緝

礦盜民賴以安丁父艱徒步奔喪既葬事之如生服闋起浙

江僉議尋陞山東驛傳副使致仕定興縣志

岳倫字厚夫保定人嘉靖十五年登進士授行人使汴歲款

見飢李塞途還朝疏請蠲賑兩劾權貴專擅數十事遂落職
爲齊東縣主簿遷曲沃知縣累晉工部郎中上幸承天倫首
諫止詔下禁獄六月罷歸倫性剛烈遇事輒發然心極慈仁
恤困扶危如恐不及言苟當理雖鄙夫亦不忍棄嘗欲上疏
闕下徧歷九邊分屯健戍選銳募勇起遼海迄蜀川修洪公
舊業以扼朔河之險追王渙遺迹以復興和之城徙朶顏諸
夷於開平廢壘以大甯池內屬振哈密孱弱之裔以制吐番
又欲仿金元故事立瀛海平灤諸鎮羽翼神京諸所經略旣
定則西羌不敢窺甘涼而吉囊俺答無能猾夏也有志未就

惜哉

畿輔
人物考

劉卓字子振清苑人嘉靖十六年舉人知潞城縣邑凋劫多
逋賦卓先撫字而後催科民德之積逋以完擢知河州恩威

並著羌岷帖然改兗州同知卒於官

保定府志

張鎬字啟周定興人嘉靖十七年進士任職方郎有三弁輦
金求陟鎬疏劾之陝西總督曾銑議復河套當事者咋舌不
敢任鎬毅然曰復之便卽有意外郎自當之累官宣大巡撫
威望屹然敵不敢犯未幾乞歸卒祀鄉賢祠鎬治兵懷來時
董一奎以事繫獄鎬力出之後一奎竟立奇功爲名將世以
是益多鎬之能知人

定興縣志

劉乾字仲坤唐縣人好讀古書爲文有秦漢氣議論英發喜
談兵事登嘉靖戊戌進士授知縣改教授所著有易菴初稿

灘上集

雍正志

郭鎮字子靜雄縣人祖俊遂於易學由貢生官太原訓導父
稟懿有文名人稱爲易津先生鎮舉嘉靖癸卯鄉試知臨朐

縣時蝗蝻遍野鎮下令以粟易蝗有大鳥自神祠飛出啄蝗而吐於水中者三日人以爲異政之感以父疾乞歸父已瀕危見鎮至喜遂瘳又七年而父沒鎮以哀毀卒年僅五十二祀鄉賢祠子存謙字仲恭萬曆三十五年進士知濰縣歲饑存謙酌義倉法而行之善政宜民擢吏部主事歷稽勳考功文選司以忤權要歸起戶部歷光祿寺丞至少卿朝官爲魏忠賢立碑頌德要存謙書名存謙堅拒之時有以浙江巡撫及太僕寺卿薦者因忤忠賢皆寢不下崇禎間進光祿寺正

卿予告歸年八十八卒存謙子石麟廩生以廩歷工部員外

郎孫沆崇禎十六年武會試一甲第三名及第

雍正志

李時芬安州人嘉靖二十二年舉人知咸陽縣政平訟理創建尊經閣敬一亭四箴亭學校一新朔望必親詣講書士民

愛戴之

陝西通志

趙宸定興人蚤慧稱神童博學有遠志楊繼盛師事焉登嘉靖二十三年進士知洪洞縣擢南御史巡按江西討平江中劇盜覈倉場積蠹擢按察司副使分守河南郡嵩縣礦盜起巡撫發兵討之宸曰民激而盜耳是可撫約官兵勿動檄郡倅入賊巢諭禍福縛渠魁四五人至斬以殉餘不問盜遂平尋致仕積羨金五千籍於官而封識之所著有梅花堂詩稿

卒祀鄉賢

定興縣志

劉止字至善清苑人天資穎悟潛心好學善詩文由貢生爲教職楊忠愍公繼盛受業其門所著有檢齋集

雍正志

康一元字東里滿城人嘉靖二十五年舉人知鳳翔縣節用愛民能雪冤獄陝西人作敬事錄記其政擢知荆門州歷三

年湖北人作德政錄頌其仁後以左遷歸作三知錄明其志

肖顏建祠兩地如一卒祀鄉賢

保定府志

楊繼盛字仲芳容城人七歲失母庶母妒使牧牛繼盛經里塾觀里中兒讀書心好之因語兄請得從塾師讀兄曰若幼何學繼盛曰幼者任牧牛乃不任學耶兄言於父聽之學然牧不廢也年十三歲始得從師學家貧益自刻勵舉鄉試卒業國子監徐階亟賞之嘉靖二十六年登進士授南京吏部主事從尙書韓邦奇遊覃思律呂之學手製十二律吹之聲畢和邦奇大喜盡以所學授之繼盛名益著召改兵部員外郎俺答躡京師咸甯侯仇鸞以勤王故有寵帝命鸞爲大將軍倚以辦寇鸞中情怯畏寇甚方請開互市市馬冀與俺答媾幸無戰鬪固恩寵繼盛以爲讐恥未雪遽議和示弱大辱

國乃奏言十不可五謬大略謂互市者和親別名也俺答蹂躪我陵寢虔劉我赤子天下大讐也而先之和不可一往下詔北伐天下曉然知聖意日夜征繕助兵食忽更之日和失信於天下不可二以堂堂中國與之互市冠履倒置不可三海內豪傑爭磨礪待試一旦委置無用異時欲號召誰復興起不可四使邊鎮將帥以和議故美衣媮食弛懈兵食不可五往時邊卒私通境外吏率裁禁今乃導之使與通不可六盜賊伏莽徒懾國威不敢肆耳今知朝廷畏怯睥睨之漸必開不可七俺答往歲深入乘我無備故也備之一歲以互市終彼謂國有人乎不可八或俺答負約不至至矣或陰謀伏兵突入或今日市明日復寇或以下馬索上值不可九歲帛數十萬得馬數萬匹十年以後帛將不繼不可十議者曰吾

外爲市以羈縻之而內修我甲兵此一謬也夫寇欲無厭其以釁終明甚苟內修武備安事羈縻日吾陰市以益我馬此二謬也夫和則不戰馬將焉用且彼甯肯予我良馬哉曰市不已彼且入貢此三謬也夫貢之賞不貲是名美而實大損也曰俺答利我市必無失信此四謬也吾之市能盡給其衆乎能信不給者之無入掠乎曰佳兵不祥此五謬也敵加己而應之何佳也人身四肢皆癰疽毒日內攻而憚用藥石可乎夫此十不可五謬明顯易見蓋有爲陛下主其事者故公卿大夫知而莫爲一言陛下宜奮獨斷悉按諸言互市者發明詔選將練兵不出十年臣請爲陛下竿俺答之首於藁街以示天下萬世疏入帝心動下鸞及成國公朱希忠大學士嚴嵩徐階呂本兵部尙書趙錦侍郎聶豹張時徹議鸞攘臂

詈曰豎子目不睹寇宜其易之諸大臣遂言遣官已行勢難中止帝尙猶豫鸞復進密疏乃下繼盛詔獄貶狄道典史地雜番俗罕知詩書繼盛簡子弟秀者百餘人聘三經師教之鬻所乘馬出婦服裝飾市田資諸生縣有煤山爲番人所據民仰薪二百里外繼盛召番人諭之咸服曰楊公卽須我曹穹帳亦舍之況煤山耶番人信愛之呼曰楊父已而俺答數敗約入寇鸞奸大露疽發背死戮其屍帝乃思繼盛言稍遷諸城知縣月餘調南京戶部主事三日遷刑部員外郎當是時嚴嵩最用事恨鸞凌己心善繼盛首攻鸞欲驟貴之復改兵部武選司而繼盛惡嵩甚於鸞且念起謫籍一歲四遷官思所以報國抵任甫一月草奏劾嵩齋三日乃上奏曰臣孤直罪臣蒙天地恩超擢不次夙夜祇懼思圖報稱蓋未有急

於請誅賊臣者也方今外賊惟俺答內賊惟嚴嵩未有內賊
不去而可除外賊者去年春雷久不聲占曰大臣專政冬日
下有赤色占曰下有叛臣又四方地震日月交食臣以爲災
皆嵩致請以嵩十大罪爲陛下陳之高皇帝罷丞相設立殿
閣之臣備顧問視制草而已嵩乃儼然以丞相自居凡府部
題覆先面白而後草奏百官請命奔走直房如市無丞相名
而有丞相權天下知有嵩不知有陛下是壞祖宗之成法大
罪一也陛下用一人嵩曰我薦也斥一人曰此非我所親故
罷之陛下宥一人嵩曰我救也罰一人曰此得罪於我故報
之伺陛下喜怒以恣威福羣臣感嵩甚於感陛下畏嵩甚於
畏陛下是竊君上之大權大罪二也陛下有善政嵩必令世
蕃告人曰主上不及此我議而成之又以所進揭帖刊刻行

世名曰嘉靖疏議欲天下以陛下之善盡歸於嵩是掩君上之治功大罪三也陛下令嵩司票擬蓋其職也嵩何取而令子世蕃代擬又何取而約諸義子趙文華輩羣聚而代擬題疏方上天語已傳如沈鍊劾嵩疏陛下以命呂本本卽潛送世蕃所令其擬上是嵩以臣而竊君之權世蕃復以子而盜父之柄故京師有大丞相小丞相之謠是縱奸子之僭竊大罪四也嚴效忠嚴鵠乳臭子耳未嘗一涉行伍嵩先令效忠冒兩廣功授錦衣所鎮撫矣效忠以病告鵠襲兄職又冒瓊州功擢千戶以故總督歐陽必進躡掌工部總兵陳圭洵統後府巡按黃如桂亦驟亞太僕旣籍私黨以官其子孫又因子孫以拔其私黨是冒朝廷之軍功大罪五也逆鸞先已下獄論罪賄世蕃三千金薦爲大將鸞冒禽哈喇兒功世蕃亦

得增秩嵩父子自誇能薦鸞矣既知陛下有疑鸞心復互相
誑詆以泯前迹鸞勾賊而嵩世蕃復勾鸞是引背逆之奸臣
大罪六也前俺答深入擊其惰歸此一大機也兵部尙書丁
汝夔問計於嵩嵩戒勿戰及汝夔逮治嵩復以論救給之汝
夔臨死大呼曰嵩誤我是誤國家之軍機大罪七也郎中徐
學詩劾嵩革任矣復欲斥其兄中書舍人應豐給事厲汝進
劾嵩謫典史矣復以考察令吏部削其籍內外之臣被中傷
者何可勝計是專黜陟之大柄大罪八也凡文武遷擢不論
可否但衡金之多寡而畀之將弁惟賄嵩不得不賸削士卒
有司惟賄嵩不得不掊剋百姓士卒失所百姓流離毒徧海
內臣恐今日之患不在境外而在域中是失天下之人心大
罪九也自嵩用事風俗大變賄賂者薦及盜跖疏拙者黜逮

夷齊守法度者爲迂疎巧彌縫者爲才能勵節介者爲矯激
善奔走者爲練事自古風俗之壞未有甚於今日者蓋嵩好
利天下皆尙貪嵩好諛天下皆尙諂源之弗潔流何以澄是
敝天下之風俗大罪十也嵩有是十罪而又濟之以五奸知
左右侍從之能察意旨也厚賄結納凡陛下言動舉措莫不
報嵩是陛下之左右皆賊嵩之間諜也以通政司之主出納
也用趙文華爲使凡有疏至先送嵩閱竟然後入御王宗茂
劾嵩之章停五日乃上故嵩得展轉遮飾是陛下之喉舌乃
賊嵩之鷹犬也畏廠衛之緝訪也令子世蕃結爲婚姻陛下
試詰嵩諸孫之婦皆誰氏乎是陛下之爪牙皆賊嵩之瓜葛
也畏科道之多言也進士非其私屬不得預中書行人選推
官知縣非通賄不得預給事御史選旣選之後入則杯酒結

歡出則饋饁相屬所有愛憎授之論刺歷俸五六年無所建
白卽擢京師諸臣忍負國家不敢忤權臣是陛下之耳目皆
賊嵩之奴隸也科道雖入籠絡而部寺中或有如徐學詩之
輩亦可懼也令子世蕃擇其有才望者羅置門下凡有事欲
行者先令報嵩預爲布置連絡蟠結深根固蒂各部堂司大
半皆其羽翼是陛下之臣工皆賊嵩之心膂也陛下奈何愛
一賊臣而忍百萬蒼生陷於塗炭哉至如大學士徐階蒙陛
下特擢乃亦每事依違不敢持正不可不謂之負國也願陛
下聽臣之言察嵩之奸或召問裕景二王或詢諸閣臣重則
置憲典輕則勒致仕內賊旣去外賊自除俺答亦必畏陛下
聖斷不戰而喪膽矣疏入帝已怒嵩見召問二王語喜謂可
指此爲罪密構於帝帝益大怒下繼盛詔獄詰何故引二王

繼盛曰非二王誰不懾嵩者獄上乃杖之百令刑部定罪侍郎王學益嵩黨也受嵩屬欲坐詐傳親王令旨律絞郎中史朝賓持之嵩怒謫之外於是尙書何鰲不敢違竟如嵩指成獄然帝猶未欲殺之也繫三載有爲營求於嵩者其黨胡植鄔懋卿怵之曰公不覩養虎者耶將自貽患嵩領之會都御史張經李天寵坐大辟嵩揣帝意必殺二人比秋審因附繼盛名並奏得報其妻張氏伏闕上書言臣夫繼盛誤聞市井之言尙狃書生之見遂發狂論聖明不卽加戮俾從吏議兩經奏讞俱荷寬恩今忽闖入張經疏尾奉旨處決臣仰惟聖德昆蟲草木皆欲得所豈惜一迴宸顧下垂覆盆倘以罪重必不可赦願卽斬臣妾首以代夫誅夫雖遠禦魑魅必能爲疆場效死以報君父嵩屏不奏遂以三十四年十月朔棄西

市年四十臨刑賦詩曰浩氣還太虛丹心照千古生平未報
恩留作忠魂補天下相與涕泣傳頌之初繼盛之將杖也或
遺之蚘蛇膽郤之曰椒山自有膽何蚘蛇爲椒山繼盛別號
也及入獄創甚夜半而蘇碎瓷盃手割腐肉肉盡筋挂膜復
手截去獄卒執燈顛欲墜繼盛意氣自如朝審時觀者塞衢
皆歎息有位下者後七年嵩敗穆宗立卹直諫諸臣以繼盛
爲首贈太常少卿謚忠愍予葬祭任一子官已又從御史郝
杰言建祠保定名旌忠明史長子應尾字錫類甫九歲而繼盛

死應尾常匿七首以圖嵩嵩敗逆子砒死乃感泣曰臣父魂
慰矣詔廢入太學累官工部員外郎遷戶部陞尙寶丞冊封

韓慶蜀三藩所至以廉慎稱

保定府志

陳典字子厚保定大甯衛人嘉靖二十九年進士任東昌府

推官有政聲內擢歷吏戶兵刑四科與同鄉楊繼盛善嘗一日三上疏言事忤嚴嵩嵩子世蕃重其名屬所親來招典不往出爲廣西按察使鞫斷冤獄全活千餘人遷河南右布政治黃河有功再遷福建左布政有擒巨寇功卒於官

保定府志

宋登字子瀛定興人年十二通春秋胡傳登嘉靖二十九年進士令廬陵剖決中理老吏不能欺擢兵部主事瀕行羸俸百金付學宮曰興學造士子素心也歸裝僅圖書數卷而已年三十卒於京邸貧無以殮同官醵金助之祀鄉賢祠

定興縣志

王用賢祁州人嘉靖二十九年進士知咸甯縣愛民好士擢

御史糾劾有聲出爲靖邊僉事營築延綏西邊陲參議卒

雍正

志

徐行博野人嘉靖三十二年進士授濟南府推官讞獄明允

一日聽訟忽風起案前跡之得死屍於積薪下沉寃以雪人呼爲徐斷鬼歷官河南左布政以疾歸

保定府志

李涑容城人由世廕爲保定後衛指揮僉事歷山西甯武關總兵官嘉靖中邊騎數萬入境巡撫趙時春親擊之遇伏涑血戰脫時春而自與長子松及遊擊李桂等皆死於八角大蟲嶺贈少保左都督諡忠愍嘉靖三十二年九月寇入神池利民諸堡時春率兵往禦至廣武擐甲欲馳涑固止之時春不從松贈指揮同知

雍正志

鄭洛字禹秀安肅人嘉靖三十五年進士除登州推官徵授御史劾罷嚴嵩黨鄔懋卿萬寀萬虞龍出爲四川參議遷山西參政佐總督王崇古欵俺答有功萬曆二年由浙江左布政使改右僉都御史巡撫山西移大同加右副都御史入爲

兵部右侍郎七年以左侍郎總督宣大山西軍務昆都力子滿五大令銀定入犯洛奏停貢市遣使責俺答罰贖駝馬牛羊乃復許欸三娘子佐俺答主貢市諸部皆受其約束及辛愛襲封年老且病欲妻三娘子三娘子不從率衆西走辛愛自追之貢市久不至洛計三娘子別屬則辛愛雖王無益乃使人語之曰夫人能歸王不失恩寵否則塞上一婦人耳三娘子聽命辛愛更名乞慶哈貢市惟謹洛以功加兵部尙書兼右副都御史十四年乞慶哈死子播力克當襲三娘子以年長自練兵萬人築城別居洛恐貢市無主復諭播力克曰夫人三世歸順汝能與之匹則王不然封別有屬也播力克盡逐諸妾復妻三娘子遂以明年嗣封并奏封三娘子忠順夫人洛乃上疏請定市馬數宣府不得踰三萬大同萬四千

山西六千而申飭將吏嚴備以防盜竊且無輕遏其部落馳獵者帝嘉納之御史許守恩劾洛乞歸不允自太子少保累加至太子太保召爲戎政尙書十八年洮河用兵詔兼右都御史經略陝西延甯甘肅及宣大山西邊務松套賓免等屢越甘肅侵擾河湟諸番及俺答迎佛又建寺於青海奏賜名仰華留永邵卜別部把爾戶及丙兔火落赤守之俱牧海上他部往來者率取道甘肅甘肅鎮臣以通欵弗禁也丙兔死其子眞相進據莽刺川火落赤據捏工川益併吞番族河套都督卜失兔亦遣使邀捨力克捨力克遺洛書以赴仰華爲名洛使從塞外行又諭忠順夫人曰彼中撫賞不能多且王家在東恐有內顧憂也捨力克遂行未至把爾戶部卒闌入西甯副總兵李奎方醉單騎馳之卒持鞞自白爲奎所斫遂

大譟射奎死火落赤真相進圍舊洮州副總兵李聯芳敗沒

入臨洮河州渭源總兵官劉承嗣失利遊擊李芳等皆死當

是時捲力克已至仰華火落赤真相益扶爲重關中大震惟

把爾戶不助逆事聞詔洛經略七鎮以僉事萬世德兵部員

外郎梁雲龍隨軍贊畫而停捲力克貢市俄罷總督梅友松

命洛兼領其事洛以洮河之禍由縱敵入青海乃馳至甘肅

令曰北部自青海歸巢者聽假道自巢入青海者卽勒兵拒

之未幾卜失兔至水泉欲趨青海總兵官張臣與相持月餘

洛設伏掩擊之卜失兔僅以身免莊禿賴後至聞之亦退去

明年洛與雲龍入西甯控扼青海捲力克聞之西徙二百里

還洮河所掠人口與忠順夫人輸罪請歸火落赤真相亦夜

去兩川餘黨留莽刺南山洛慮諸部約結先遣使趣捲力克

北歸別遣雲龍世德收番族以弱其勢而具以狀奏聞言自
順義南牧借途收番子女牛羊皆有之生死唯所制洮河之
役遂爲嚮導番戎之勢不分則心腹之患無已臣鼓舞勞來
招回諸番八萬餘人皆陛下威德所致且具陳收番有六利
是時捨力克觀望不卽歸洛與相羈縻先遣總兵官尤繼先
擊走莽刺餘寇督撫魏學會葉夢熊等請決戰夢熊又騰書
都下洛疏持不可夢熊乃調苗兵三千爲選鋒詆洛爲秦檜
賈似道會捨力克北歸謝罪乞復貢市洛乃進兵青海走火
落赤真相焚仰華置戍西甯歸德而還尙書石星以宣大事
急請速召洛究欵戰之計洛旣至與總督蕭大亨巡撫王世
楊邢玠等上疏曰捨力克諉罪火落赤真相桀驁之狀已斂
且其部落數千里部長十餘輩在巢保疆者宣鎮則青把都

兄弟又嘗東窺劄遼而兀慎擺腰五路之在新平馴服猶故
在西行牧者不他失未嘗窺莽捏而大成比妓則又歸巢獨
先令以一人之罪慨絕諸部消往日之恩開將來之隙臣未
見其可今史二外叛屢犯邊疆若令順義王縛獻以著信然
後酌議市賞在我固未爲失策也議遂定尋加少保仍召理
戎政順義王果縛史二來獻復欵如故初閱邊給事中張棟
言洮河之衄殞將喪師洛爲其所輕故東西移帳自便太僕
寺丞徐瑛復詆洛乞處分以除誤國之罪棟再疏劾洛欺罔
給事中章尙學亦請令洛回宣大至是擿力克歸棟又言火
眞亂首順義亂階洛宜除兇雪恥乃虛詞誘敵而重利媚之
今火眞依海爲窟出沒如故洛輒然敘文武勞乞敕所司毋
徇洛請洛乃謝病歸尙書星言洛無重利啗敵事且有威望

不宜久棄逾三年官軍與番人夾擊把爾尸於西甯大破之
星復奏洛收番之功再詔起用當時以洛有物議卒不准也

卒贈太保諡襄敏

明史

宋大儒字道行清苑人嘉靖四十年舉人事親孝博學善屬

文所修縣志言約事該與劉堯卿齊名累官府同知

雍正志

王汝梅安肅人嘉靖四十一年進士知益都縣政簡宜民擢

戶部主事督餉三關公私稱便累遷副都御史巡撫延綏

安肅志

縣值大饑力請蠲賑全活甚多

陝西通志

以憂歸屢薦不起

安肅縣志

劉堯卿清苑人嘉靖四十四年進士累官浙江參政敏悟過

人讀書破萬卷邑令延修縣志或請求古冊考遺事堯卿曰

止須毫楮耳奚藉書為當時服其淹博

雍正志

王軒字臨卿清苑人嘉靖四十四年進士除六安州廉謹自

矢入覲時或諷之納金部下軒笑曰吾豈括民而奉貴人者
 垂橐以行擢南刑部員外郎出知寶慶府改保甯識楊應龍
 奸收之獄會入覲不及治郡倅受代擅縱之未幾叛眾服其
 先見擢四川按察副使親老乞歸著有易說肯綮傷寒六書
 行世子允康官雷州知府

清苑縣志

許大亨字貞甫安肅人嘉靖四十四年進士授兗州府推官
 辨張子時之寃人號神明拜御史按雲南卻樣金珠寶累萬
 又奏免採金之額劾黔國沐朝弼之暴滇人尸祝之再按蘇
 松以忤張居正出為漢中知府上疏乞歸杜門謝客片刺不
 入公府母病以代顛天夢賜良醫母病果愈

分省人物考

宋豸容城人嘉靖四十四年進士授行人使宗藩力卻饋遺
 遷戶部主事歷郎中監兌河南漕米溢額百萬奏佐兵餉詔

賜金幣尋知汝甯府每事必焚香告天建天中書院講學論

文遷山東鹽運使致仕

保定府志

師道南字從時安肅人嘉靖時諸生

雍正志

性孝友產既析矣

以諸昆日貧復量予之曰諸昆弗飽二親弗樂也人以是多

之年八十有一卒子心官高唐州自有傳

安肅縣志

劉秉仁唐縣人嘉靖中由貢生任建昌府檢校值流賊犯境

戰沒於陣贈太僕丞廕一子人監

雍正志

畿輔通志卷二百十九

列傳二十七 明四

明

保定府

王鉞

孫登三
登三子承芳

任天民

薛論道

弟虎臣

張棟

范錫

子文源

楊國召

王尙武

甯化龍

邢雲路

鹿久徵

張廷試

師心

子兩助
雅助

梁見孟

劉不盈

賈鈞

子鴻洙

鄭棻

李鳳翔

劉汝教

陳采

張純臣

楊廷謨

田一井

劉昌印

王家賓

孫承宗子鈔 鍾 鎬 從子鍊 孫之沆 之滂 之澤 之濼 之浩 之憲 從孫之澈 之漢 之

泳 之澗 之渙 管嗣章 薛一鶚

馮冕 耿好仁 周日强

韓東明 崔庚 鹿善繼父正 子化麟

李國楷 劉似鰲 馬鐸

耿啟 王孫蕃 李乘雲子宜之

王明善從弟建善 王行健子奎光 常世爵

劉沂 潘甲第 郭良時子如僑

賀虎臣子讚 弟誠 胡向化 許天允子國士

張居 尹洗 張鵬冲

王喬棟 張果中 孔衍學

刁包父克俊 吳憲湯 孫從範

李萃秀 子宏禎

郭名揚

陳居恭

李節之

劉朝任

張羅俊 弟羅彥
羅善 羅

輔 羅俊子仲
彥子晉

羅 孫從度

劉會昌

王維誠

賀秉鉞

陳所聞

張爾暈

孫爾禎 弟爾祚

王家祚

金毓峒 從子肖孫
振孫

荆璩

鄭延休

劉三星 楊茂

蔡學詩

唐中穎

王世琇

管德升

高重光

張純儒

魏克家

梁以樟

王鼎銘

高涇

劉名言

許純誠

劉秉仁

孫煌

李邁林

賀珍 張維綱

王之珽 何一中
杜日芳

王法 王景曜 王絃 吳栻 王世珩 王致中 王建
建極 王昌祚 王敬嗣 趙居晉 趙世珩 顏學曾

韓延珍 劉士廉 周之韓 王建基 何光岳 孫誠
王繼桂 楊拱辰 楊善譽 阮積學 王嘉印 劉宗向

劉自重 田仰名 王棟 李懋倫 王捷 張智 劉
養心 朱永甯 胡來獻 胡得銀 鄭國甯 張嘉善

楊強子 劉忠嗣 呂應蛟 張大同 張大同子之

垣 梁儒秀 管民治 楊仁政 李尚忠 紀勳 趙世
貴 劉本源 侯繼先 張守道 劉朝卿 劉悅 田守

正 王好善 強忠武 王爾祉 郝國 韓楓
忠 申錫

王延善 子餘恪 王餘厚 王餘佑

陳嘉猷 陳國政 郭彭了凡
鳴世 馮澤

明

保定府

王鉞清苑人隆慶四年舉人知武城縣做社倉法勸民積儲
後年饑散賑武城全活者三萬餘家擢魯王府長史王好遊

獵鉞多所匡正王甚憚之嘗出扇屬作書鉞書左傳虞箴以

進後以親老乞歸

雍正志

祀武城名宦祠

清苑縣志

孫登三萬歷癸

丑進士歷官職方郎遭璫禍幾不免崇禎元年上覽玉鏡新

談見登三劾逆黨張體乾疏嘉其忠召見授太僕卿未幾以

病免歸登三子承芳字繼美恂恂雅飭讀書無間寒暑博學

善屬文尤長於詩有邁亭存稿四集

雍正志

任天民字拙齋定興人好讀書過目成誦事親孝執親之喪

獨處三年未嘗入私室妻死不更娶由貢生任靈寶教諭勢

豪侵學宮基力爭不得乃乞歸輯縣志三卷

雍正志

薛論道定興人少得疾遇異人鍼之瘥曰當跛一足不跛不

貴已而果跛八歲能屬文試有司輒冠軍親沒家貧遂輟舉

業讀兵書往來公卿間羣呼為別先生神堂谷有警論道倡

議利用寡不利用衆制府用其策郤十萬衆捷聞擢指揮僉
事萬厯初戚繼光屯薊議棄黑谷關論道馳詣制府力陳不
可狀事竟寢以是失繼光意移疾罷久之以功擢三級加副
將歸弟虎臣字桓大初名好道性剛有威嗜書從論道官密
雲制府召試大奇之曰此虎臣也趣就武改今名舉將才授
中衛鎮撫厯都司謀勇日著嘗奉秘檄偵塞外遇敵戰失利
法當死以殺傷相當貸其死虎臣伏不起呼之乃曰腹有刀
蓋自刺也有黃冠予藥創愈萬厯朝鮮之役徵諸路兵所在
淫掠惟虎臣所部以節制稱南原不守三路奔潰虎臣孤軍
堅壁與倭相持踰年竟乘間奪萬山之老寨朝鮮人遺美姝

堅拒之其王築官肖像以旌其德再擢石門參將罷歸

定興縣志

張棟字還朴安肅人萬厯二年進士官蘭州兵備副使楊應

龍叛棟監軍討應龍四川總督李化龍與棟同舉進士相得甚歡而將軍劉縉以各持崖岸相齟齬應龍未叛時縉爲副將嘗以事過之應龍待之厚及叛縉圍其城久不下當事者疑其私將置之法棟曰縉雖不馴血性人也必不負國敢以百口保之議遂寢卒賴縉攻克其城人以是服棟之識量未幾棟卒於軍縉爲視含殮贈太僕寺卿廕一子

畿輔人物考

范錫字子純定興人舉萬曆四年鄉試知許州時州遭大祲土地荒蕪錫設法市牛勸墾訟不直者罰耕田許以蔓根贖罪墾田十餘萬畝蔓根山積乃以燒磚修城患費不貲改館陶漕糧爲招商歲省輓運銀千九百兩又令徵鞭銀併收錢南陽錢大貴令人鬻之獲羨金千兩遂鳩材傭工甃城以磚延袤凡十里不匝月而葺事又築隄衛潁水而陂之環陂十

六里教民興水利闢稻畦二萬餘畝定興縣志擢大同東路同知

創建廣積倉宏厥精密甲於雲中尤盡心學校視士子如家

人山西通志督餉陽和倉政一新前後節費數十萬緡中官欲採

瑪瑙錫以二百金賂當事寢之權稅中使議倍科草場歲賦

四千金錫力爭復以所節之費二千金抵之乃止考滿當遷

遂致仕祀鄉賢祠子文源字景龍歷知環及萬泉兩縣多善

政有平稷山巨盜功終工部郎中定興縣志

楊國召定興人年三十謝制舉業日讀性理書能發其言外

旨與同里范錫善錫講經濟國召精名理各以所長相服被

教者盡成名雋人擬之胡安定雍正志

王尚武字健夫新安人性孤介讀書根極理要以貢入太學

有巨璫招之不往任太原令得罪巨室遷晉府審理告歸學

者稱爲通滄先生所著有樂汲說

雍正志 案本傳不詳年
代姑從雍正志次楊國召

傳後

甯化龍字文明新安人萬歷五年第進士授中書舍人陞工部員外郎權稅荊州禁奸節費通商惠民比得代課無溢額橐無私裝荆人士爲詩歌以頌之晉虞衡司郎中誠心爲質聲稱藉甚陞山西按察副使備兵赤城明約束嚴號令懲偷惰之習清虛耗之蠹凡所經理悉綢繆大計謂龍門虜衝獨石隔遠裨將一人難於兼制申請部臣奏增參將一人分守其地未幾史酋寇龍門化龍督遊擊杭大才與戰于唐子衡斬獲甚衆移潼關練兵積餉盜賊屏息歷官陝西左布政使

卒

分省人
物考

邢雲路字子登安肅人萬歷八年進士

雍正志

仕臨汾令時久

旱流移載道雲路繪圖請賑又引山泉灌田數十里民尸祝

之安肅縣志歷官陝西副使著古今歷律考七十二卷臨終謂其

子曰四十年苦心十一朝鉅典可當茂林遺書其善藏之雍正

志

鹿久徵字豫軒定興人萬歷八年進士初任息縣時有均田

之詔部使者令諸屬各署上中下壤獨息盡以下田報批駁

四五至面噉讓之久徵歎曰是紓民乃蹙民乎持初議不移

得無加賦息田故額二萬八千頃以履畝占隱畢出溢四千

餘頃則盡以見賦通攤之田乃大均再蒞襄垣襄歲洊饑流

亡者眾前令以逋賦責存者久徵案籍開除懸額七百戶存

者以蘇流亡復業擇諸生材美者課藝授餐貧不能婚者為

擇配資給之以治最擢御史畿輔人物考時上敕百官修省久徵

謂天之怒不專在百僚回天之政不專在靡文陳修省之實

三事曰省聖躬禁酷吏恤民隱上納之及按蘇松興革十六

事悉中機宜

定興縣志

神宗因軍政事移怒南北臺省斥五十餘

人久徵適服除還上疏申救

畿輔人物考

其詞曰古聖帝明王愛

惜人才爲社稷計也軍政考察不當斥兵科諸給事足矣並

各科斥之又並各道御史斥之何也謂不言耶間多向之敢

言者謂目擊時事不言耶間多奉差在外者是皇上以不言

爲罪之名而以言爲罪之實耳何以示天下後世乎且九卿

連名之疏非國家大事不舉非甚不得已之事不再舉至如

閣臣揭不行則疏疏不行則人各一疏豈皆故私諸言官哉

誠不忍坐視君父之舉動已甚而諄諄懇懇以冀回天於萬

一也夫一時逐去科道三十餘人二百餘年所罕有部院閣

臣進言乃不但拒之又從而甚之尤二百餘年所罕有也夫

臺省無可容之言官廟廊無可信之元臣則主勢孤於上羣

情疑於下矣皇上縱不顧言官不顧大臣獨不顧社稷乎臣

等豈不知罪之不可叢而反覆思維皇上留臣等非以備員

尸位而以補過拾遺也知而不言與畏而不言失職之中又

失職焉甯獨有媿言者其媿去者亦遠矣鹿氏家譜疏入謫澤州

判而直聲動中外尋歸里杜門謝客教子孫讀書泊如也天

啟朝贈光祿寺少卿畿輔人物考

張廷試字策卿清苑人萬歷十年舉人授沁水令邑有老馬

嶺距縣治遠盜時時椎埋行旅患之廷試奏記台司築堡于

嶺設巡檢司道路以甯尋致仕保定府志

師心字子仁安肅人萬歷十年舉人授遼東通判明敏果決

改知代州絕羨金除胥弊兵民畏懷御史某案晉修前卻調
登州判適天津饑心督運百餘艘過之而津人若不知者其
嚴整慈愛有如此歷高唐州知州彰德府同知引年歸長子
兩助字勗又萬曆四十年舉人歷官戶部郎中權蕪湖關弊
蠹一清出守常德撫輯兵民有能聲榮藩欲奪民間桐油兩
助竟勘還之民忤上意以病乞歸次子雅助字叔達天啟五
年進士官翰林檢討魏闡知其才以華屋館之雅助曰余故
有居小而安胡不以假無棲者耶璫不懌罷歸

雍正志

梁見孟字醕宇安肅人萬曆十七年進士授湖廣推官執法
明允召擢吏部主事銓政肅清累遷湖廣巡撫副都御史卒

於官

雍正志

劉不盈字夙知清苑人潞城知縣卓之孫萬曆二十三年進

士官工部主事權浙江關課浮四萬餘金欲報部恐據為例

以病商民乃貯於庫日時有豐歉物有盈絀留備後人補額

官至陝西按察使子昌祚字延熙年十六補邑弟子員慨然

日八股乃敲門瓦耳遂棄去沉酣古籍寒暑無間闢一室督

子弟誦習之積書萬卷郡邑有大典禮輒就討故實焉雍正志

賈鈞字太承清苑人舉萬曆二十五年鄉試知猗氏縣有惠

政擢大理寺正卿盡力平反要人每撼以危語屹如也遷戶

部郎中題覆汰諸冗官議歲省萬餘金以病乞歸畿輔人物考著

有左粹一編鳴鶴詩四十卷卒祀鄉賢保定府志鈞性孝友疾亟

時猶貽書其子鴻洙以善待弟姪族黨相勗云鴻洙萬曆四

十四年進士性亦孝友居父喪毀幾危身官至河南左布政

畿輔人物考其分守懷慶時亦不建魏瑞生祠幾罷官提學陝西

有關西夫子之號

保定府志

鄭棻字思衆洛第四子有俊才中萬曆二十五年經魁讀書

卓犖詞賦妍麗人多傳誦之

雍正志

李鳳翔字漢儀東鹿人萬曆二十五年舉人知荏平縣辯周

朴冤獄時稱神君有辯冤招參行世官終南戶部主事

東鹿縣志

劉汝教唐縣人號育山樵子幼機穎長益苦心於文自謂攜

撫兩漢劄劂先秦以成吾之磊落已而七試七黜歎曰非文

之厄實運之塞耳遂嗜莊騷日事詩酒所著有育樵吟五卷

雍正志

案本傳不詳年代

姑從雍正志次李鳳翔傳後

陳采字文孺清苑人萬曆二十六年進士除歷城縣德藩尉

以盜匿王所采從擁蓋中捕之王怒執捕者采語王曰令以

捕盜觸王不失為強項王以匿盜難令令其如王何隨投牒

挂冠王出捕者為謝乃以署德州篆庾羨萬三千金乞臺檄
儲歷城帑抵歲租十之三以卓異擢吏部主事出參楚藩執
法明刑餉餘萬八千金概謝不顧累官至通議大夫卒祀鄉

賢清苑
縣志

張純臣字良弼清苑人少工舉子業徙而學騎射中萬歷二
十六年武進士官神機營副將加都督僉事入歷邊鎮撫卒
均役節餉墾田有古良將風卒於官雍正
志

楊廷謨清苑人萬歷二十八年舉人知平遙縣清畝稅修學
校愛民如子有循良聲陞光祿寺署正山西
通志

田一井字尙助安州人萬歷二十九年進士官戶部主事請
發通州倉以賑流民出為山東副使監登萊軍白蓮教倡亂
一井謂脅從可憫議主撫不用後視師海上至皇城島見流

民數千悉以舟渡歸全活甚衆有天橋口往往覆舟一井別
鑿港垂成海潮至一井屹立不動叱曰吾爲百姓作福海神
欲壞之耶潮遽退人咸異之未幾以忤上官歸

雍正志

劉昌印字善同雒縣人萬曆二十一年舉人知成縣山多礦
盜諭以大義解散之上官知其才命兼攝徽州時兩當縣官
被殺安定民亦殺胥吏毆縣官皆委昌印往緝旋調補安定
期年而大治陞延安同知署隴州除開採之害清鼓鑄之奸
漢中王就封所至騷動巡撫命昌印司供應昌印乃懲患中
官舍陸登舟省費鉅萬又委攝清水汧陽等處以覲入都乞
歸起南錦衣衛經歷不仕南左都御史特疏保薦亦不就其
官陝西時魏璫當語人云善同倘一札及吾當立致顯秩而
昌印卒不與通人皆稱昌印有長駕遠馭之才而能不苟且

以營祿位蓋古烈丈夫之徒歟

雄縣志

王家賓字國重定興人萬曆三十二年進士官戶部郎中權稅臨清值畿輔大旱家賓惻然傍徨達旦竟以額課三萬金解正定佐賑而後具疏以聞或言宜俟旨家賓曰若是則當索於枯魚之肆矣以救萬人之命而罷官吾所願也全活無算擢青州府遷充東道以鄒滕寇變謫守高州尋陞河東道有以金壺盛藥酒饋者家賓大怒召其人返其酒而嚴斥之累官陝西布政使致仕

定興縣志

孫承宗字稚繩高陽人貌奇偉鬚髯戟張與人言聲殷牆壁始爲縣學生授經遼郡往來飛狐拒馬間直走白登又從紇干清波故道南下喜從材官老兵究問險要阨塞用是曉暢邊事萬曆三十二年登進士第二人授編修進中允挺擊變

起大學士吳道南以諮承宗對曰事關東官不可不問事連
貴妃不可深問龐保劉成而下不可不問也龐保劉成而上
不可深問也道南如其言具揭上之事遂定出典應天鄉試
發策著其語撻黨人忌將以大計出諸外學士劉一燝保持
乃得免歷諭德洗馬熹宗卽位以左庶子充日講官帝每聽
承宗講輒曰心開故眷注特殷天啟元年進少詹事時瀋遼
相繼失舉朝洶洶御史方震孺請罷兵部尙書崔景榮以承
宗代廷臣亦皆以承宗知兵遂推爲兵部添設侍郎主東事
帝不欲承宗離講筵疏再上不許二年擢禮部右侍郎協理
詹事府未幾

大清兵逼廣甯王化貞棄城走熊廷弼與俱入關兵部尙書張
鶴鳴懼罪出行邊帝亦急東事遂拜承宗兵部尙書兼東閣

大學士入直辦事越數日命以閣臣掌部務承宗上疏曰邇年兵多不練餉多不覈以將用兵而以文官招練以將臨陣而以文官指發以武略備邊而日增置文官於幕以邊任經撫而日問戰守於朝此極弊也今天下當重將權擇一沉雄有氣略者授之節鉞得自辟置偏裨以下勿使文吏用小見沾沾陵其上邊疆小勝小敗皆不足問要使守關無闌入而徐爲恢復計因列上撫西部恤遼民簡京軍增永平大師修薊鎮亭障開京東屯田數策帝褒納焉時邊警屢告閣部大臣幸且暮無事而言路日益紛呶承宗乃請下廷弼於理與化貞並讞用正朝士黨護又請逮給事中明時舉御史李達以懲四川之招兵致寇者又請詰責遼東巡按方震孺登萊監軍梁之垣薊州兵備邵可立以警在位之骫骳者諸人以

次獲譴朝右聳然而側目怨咨者亦衆矣兵部尙書王在晉
伐延弼經略遼東與總督王象乾深相倚結象乾在薊門久
習知西部種類情性西部亦愛戴之然實無他才唯啖以財
物相羈縻冀得以老解職而已在晉謀用西部襲廣甯象乾
碁之曰得廣甯不能守也獲罪滋大不如重關設險衛京師
在晉乃請於山海關外八里鋪築重關用四萬人守之其僚
佐袁崇煥沈榮孫元化等力爭不能得奏記於首輔葉向高
向高曰是未可臆度也承宗請身往決之帝大喜加太子太
保賜蟒玉銀幣抵關詰在晉曰新城成卽移舊城四萬人以
守乎在晉曰否當更設兵曰如此則八里內守兵八萬矣一
片石西北不當設兵乎且築關在八里內新城背卽舊城趾
舊城之品坑地雷爲敵人設抑爲新兵設乎新城可守安用

舊城如不可守則四萬新兵倒戈舊城下將開關延入乎抑
閉關以委敵乎曰關外有三道關可入也曰若此則敵至而
兵逃如故也安用重關曰將建三塞於山以待潰卒曰兵未
潰而築塞以待之是教之潰也且潰兵可入敵亦可尾之入
今不爲恢復計畫關而守將盡撤藩籬日閱堂奧畿東其有
甯宇乎在晉無以難承宗乃議守關外監軍閻鳴泰主覺華
島袁崇煥主甯遠衛在晉持不可主守中前所舊監司邢愼
言張應吾逃在關皆附和之初化貞等既逃自甯遠以西五
城七十二堡悉爲哈喇愼諸部所據聲言助守邊前哨遊擊
左輔名駐中前實不出八里鋪承宗知諸部不足信而甯遠
覺華之可守已決計將自在晉發之推心告語凡七晝夜終
不應還朝言敵未抵鎮武而我自燒甯前此前日經撫罪也

我棄甯前敵終不至而我不敢出關一步此今日將吏罪也將吏匿關內無能轉其畏敵之心以畏法化其謀利之智以謀敵此臣與經臣罪也與其以百萬金銀浪擲於無用之版築曷若築甯遠要害以守八里鋪之四萬人當甯遠衝與覺華相犄角敵窺城合島上卒旁出三岔斷浮橋繞其後而橫擊之卽無事亦且收二百里疆土總之敵人之帳幕必不可近關門杏山之難民必不可置膜外不盡破庸人之論遼事不可爲也其他制置軍事又十餘疏帝嘉納無何御講筵承宗面奏在晉不足任乃改南京兵部尙書并斥逃臣慎言等而入里築城之議遂息在晉旣去承宗自請督師詔給關防敕書以原官督山海關及薊遼天津登萊諸處軍務便宜行事不從中制而以鳴泰爲遼東巡撫承宗乃辟職方主事鹿

善繼王則古爲贊畫請帑金八十萬以行帝特御門臨遣賜
尙方劍坐蟒閣臣送之崇文門外既至關令總兵江應詔定
軍制僉事崇煥建營舍廢將李秉誠練火器贊畫善繼則古
治軍儲沈棨杜應芳繕甲仗司務孫元化築礮臺中書舍人
宋獻羽林經歷程崙主市馬廣甯道僉事萬有李主採木而
令遊擊祖大壽佐金冠於覺華副將陳諫助趙率教於前屯
遊擊魯之甲拯難民副將李承先練騎卒參將楊應乾募遼
人爲軍是時關上兵名七萬顧無紀律冒餉多承宗大閱汰
逃將數百人遣還河南正定疲兵萬餘以之甲所救難民七
千發前屯爲兵應乾所募遼卒出戍甯遠咨朝鮮使助聲援
犒毛文龍於東江令復四衛檄登帥沈有容進據廣鹿島欲
以春防躬諸登萊商進取而中朝意方急遼弗許也

明史出鎮

纔五閱月兵民安堵文武輯睦商旅雲屯卒乘競勸乃立六館曰占天謂通仰觀風角者曰察地謂習山川阨塞者曰番譯謂識敵字敵情者曰偵諜謂能出入敵境者曰異材劍俠謂有劍術如荆聶之流者曰大力捷足謂能挽強及飛簷走壁者以招天下之豪傑焉年譜應詔被劾承宗請用馬世龍代之以尤世祿王世欽爲南北帥聽世龍節制且爲世龍請尙方劍帝皆可之世龍旣受事承宗爲築壇拜行授鉞禮率教已守前屯盡驅哈喇慎諸部撫場猶在八里鋪象乾議開水關撫之關內承宗不可乃定於高臺時

大清兵委廣甯去遼遣民入居之插漢部以告有李有李謀挾西部乘間殲之冒恢復功承宗下檄曰西部殺我人者致罰如盟言是役也全活千餘人帝好察邊情時遣人詣關門具

事狀奏報名曰較事及魏忠賢竊政遣其黨齎內庫神礮甲仗弓矢之屬數萬至關門爲軍中用又以白金十萬蟒麒麟獅子虎豹諸幣頒將士而賜承宗蟒服白金慰勞之實覘軍也承宗方出關巡甯遠中路聞之疏言中使觀兵自古有戒帝溫旨報之使者至具杯茗而已鳴泰之爲巡撫也承宗薦之後知其無實軍事多不與議鳴泰求去承宗亦引疾言官共留承宗詆鳴泰巡關御史潘雲翼復論劾之帝乃罷鳴泰而以張鳳翼代鳳翼怯復主守關議承宗不悅乃復抵甯遠集將吏議所守衆多如鳳翼指獨世龍請守中後所而崇煥善繼及副將茅元儀力請守甯遠承宗然之議乃定令大壽興工崇煥滿桂守之先是虎部竊出盜掠率教捕斬四人象乾欲斬率教謝虎部承宗不可而承宗所遣王楹戍中右護

其兵出採木爲西部朗素所殺承宗怒遣世龍剿之象乾恐
壞撫局令朗素縛逃人爲殺楹者以獻而增市賞千金承宗
方疏爭而象乾以憂去承宗患主款者撓已權言督師總督
可勿兼設請罷已不可則弗推總督并請以遼撫移駐甯遠
帝命止總督推而鳳翼謂置已死地也因大恨與其鄉人雲
翼有孚等力毀世龍以撼承宗無何有孚爲薊撫岳和聲所
劾益疑世龍與崇煥構陷乃共爲浮言撓出關計給事中解
學龍遂極論世龍罪承宗憤抗疏陳守禦策言拒敵門庭之
中與拒諸門庭外勢旣辨我促敵二百里外敵促我二百里
中勢又辨蓋廣甯我遠而敵近甯遠我近而敵遠我不進逼
敵敵將進而逼我今日旣不能恢遼左而甯遠覺華終不可
棄請救廷臣雜議主客之兵可否久戍本折之餉可否久輸

關外之土地人民可否捐棄屯築戰守可否興舉再察敵人情形果否坐待可以消滅臣不敢爲百年久計祇計及五年間究竟何如倘臣言不當立斥臣以定大計無紆迴不決使全軀保妻子之臣附和衆喙以殺臣一身而誤天下也復爲世龍辨而發有孚等交構狀有孚者故侍郎世德子也爲廣甯理餉同知城陷逃歸象乾題爲廣甯道僉事專撫插漢乾沒多至是以承宗言被斥鳳翼亦以憂歸喻安性代而廷臣言總督不可裁命吳用先督薊遼代象乾承宗惡本兵趙彥多中制稱疾求罷舉彥自代以困之廷議不可而止時甯遠城工竣關外守具畢備承宗圖大舉奏言前哨已置連山大凌河速昇臣餉二十四萬則功可立奏帝命所司給之兵工二部相與謀曰餉足渠卽妄爲不如許而不與文移往復稽

緩之承宗再疏促具以情告帝爲飭諸曹而師竟不果出初方震孺游士任李達明時舉之譴承宗實劾之後皆爲求宥復稱楊鎬熊廷弼王化貞之勞請免死譴戍朝端譁然給事中顧其仁許譽卿御史袁化中交章論較帝皆置弗問會承宗敘五防效勞諸臣且引疾乞罷乃遣中官劉應坤等齎帑金十萬犒將士而賜承宗坐蟒膝襪佐以金幣當是時忠賢益盜柄以承宗功高欲親附之令應坤等申意承宗不與交一言忠賢由是大憾會忠賢逐楊漣趙南星高攀龍等承宗方西巡薊昌念抗疏帝未必親覽往在講筵每奏對輒有入乃請以賀聖壽入朝面奏機宜欲因是論其罪魏廣微聞之奔告忠賢承宗擁兵數萬將清君側兵部侍郎李邦華爲內主公立糞粉矣忠賢悸甚繞御牀哭帝亦爲心動令內閣擬

旨次輔顧秉謙奮筆曰無旨離信地非祖宗法違者不宥夜

啟禁門召兵部尙書入令三道飛騎止之又矯旨諭九門守

闔承宗若至齊化門反接以入承宗抵通州聞命而返忠賢

遣人偵之一襍被置輿中後車鹿善繼而已意少解而其黨

李蕃崔呈秀徐大化連疏詆之至比之王敦李懷光承宗乃

杜門求罷五年四月給事中郭興治請令廷臣議去留論旨

餉者復踵至遂下廷臣雜議吏部尙書崔景榮持之乃下詔

勉留而以簡將汰兵清餉三事責承宗奏報承宗方遣諸將

分戍錦州大小凌河松杏右屯諸要害拓地復二百里罷大

將世欽世祿副將李秉誠孫諫汰軍萬七千餘人省度支六

十八萬而言官論世龍不已至九月遂有柳河之敗死者四

百餘人語詳世龍傳於是臺省劾世龍并及承宗章疏數十

上承宗求去益力十月始得請先已屢加左柱國少師太子太師中極殿大學士遂加特進光祿大夫廕子中書舍人賜蟒服銀幣行人護歸而以兵部尙書高第代爲經略無何安性亦罷遂廢巡撫不設初第力扼承宗請撤關外以守關內承宗駁之第深憾明年甯遠被圍乃疏言關門兵止存五萬言者益以爲承宗罪承宗告戶部曰第初莅關嘗給十一萬七千人餉今但給五萬人餉足矣第果以妄言引罪後忠賢遣其黨梁夢環巡關欲傳致承宗罪無所得而止承宗在關四年前後修復大成九堡四十五練兵十一萬立車營十二水營五火營二前鋒後勁營八造甲冑器械弓矢礮石渠答鹵楯之具合數百萬拓地四百里開屯五千頃歲入十五萬後敘甯遠功廕子錦衣世千戶莊烈帝卽位在晉入爲兵部

尙書恨承宗不置極論世龍及元儀熒惑樞輔壞關事又嗾臺省交口詆承宗以沮其出二年十月

大清兵入大安口取遵化將薄都城廷臣爭請召承宗詔以原官兼兵部尙書守通州仍入朝陛見承宗至召對平臺帝慰勞畢問方略承宗奏臣聞袁崇煥駐薊州滿桂駐順義侯世祿駐三河此爲得策又聞尤世威回昌平世祿駐通州似未合宜帝問卿欲守三河何意對曰守三河可以沮西奔遏南下帝稱善曰若何爲朕保護京師承宗言當緩急之際守陣人苦飢寒非萬全策請整器械厚犒勞以固人心所條畫俱稱旨帝曰卿不須往通其爲朕總督京城內外守禦事務仍參帷幄趣首輔韓爌草勅下所司鑄關防承宗出漏下二十刻矣卽周閱都城五鼓而畢復出閱重城明日夜半忽傳旨

守通州明史上令以三千兵護行承宗笑曰滿地敵馬三千可

護乎且此三千兵安在乎以二十四騎出東便門第二子鈐

四子鎗欲同往承宗遣鎗入城就鹿善繼商略機事鈐不忍

別茅元儀奪所佩刀大言曰師相此行左手勳名右手節烈

何所不可乃決別其子姪日入抵通州城下衆不信保撫解

經傳縋一弁出視始啟門入已二鼓矣年譜既入城與保定巡

撫解經傳御史方大任總兵楊國棟登陴固守而

大清兵已薄都城乃急遣遊擊尤岱以騎卒三千赴援旋遣副

將劉國柱督軍二千與岱合而發密雲兵三千營東直門保

定兵五千營廣甯門以其間遣將復馬蘭三屯二城至十二

月四日而有祖大壽之變大壽遼東前鋒總兵官也偕崇煥

入衛見崇煥下吏懼誅遂與副將何可綱等率所部萬五千

人東潰遠近大震承宗聞急遣都司賈登科齎手書慰諭大壽而令遊擊石柱國馳撫諸軍大壽見登科言麾下卒赴援連戰俱捷冀得厚賞城上人羣詈爲賊投石擊死數人所遣邏卒指爲間諜而殺之勞而見罪是以奔還當出搗朶顏然後東身歸命柱國追及諸軍其將士持弓刀相向皆垂涕言督師旣戮又將以大礮擊斃我軍故至此柱國復前追大壽去已遠乃返承宗奏言大壽危疑已甚又不肯受滿桂節制因譌言激衆東奔非部下盡欲叛也當大開生路曲收衆心遼將多馬世龍舊部曲臣謹用便宜遣世龍馳諭其將士必解甲歸大壽不足慮也帝喜從之承宗密札諭大壽急土章自列且立功贖督師罪而已當代爲剖白大壽諾之具列東奔之故悉如將士言帝優詔報之命承宗移鎮關門諸將聞

承宗世龍至多自拔來歸者大壽妻左氏亦以大義責其夫
大壽歛兵待命當潰兵出關關城被劫掠閉門罷市承宗至
人心始定關城故十六里衛城止二里今敵在內關城無可
守衛城連關可步屨而上也乃別築牆橫互於關城穴之使
礮可平出城中水不足一晝夜穿鑿百井舊汰牙門將僑寓
者千人窮而思亂皆廩之於官使巡行街衢守臺護倉均有
所事內間不得發外來者輒爲邏騎所得由是關門守完乃
遣世龍督步騎兵萬五千入援令遊擊祖可法等率騎兵四
營西戍撫甯三年正月大壽入關謁承宗親軍五百人甲而
候於門承宗開誠與語卽日列其所統步騎三萬於教場行
誓師禮羣疑頓釋時我

大清已拔遵化而守之是月四日拔永平八日拔遷安遂下灤

州分兵攻撫甯可法堅守不下

大清兵遂向山海關離三十里而營副將官惟賢等力戰乃還
攻撫甯及昌黎俱不下當是時京師道梗承宗大壽軍在東
世龍及四方援軍在西承宗募死士沿海達京師始知關城
尙無恙關西南三縣曰撫甯昌黎樂亭西北三城曰石門臺
頭燕河六城東護關門西繞永平皆近關要地承宗飭諸城
嚴守而遣將戍開平復建昌聲援始接方京師戒嚴天下勤
王兵先後至者二十萬皆壁於薊門及近畿莫利先進詔旨
屢督趣諸將亦時戰攻然莫能克復世龍請先復遵化承宗
曰不然遵在北易取而難守不如姑留之以分其勢而先圖
灤今當多爲聲勢示欲圖遵之狀以牽之諸鎮赴豐潤開平
聯關兵以圖灤得灤則以開平兵守之而騎兵決戰以圖永

得灤永則關永合而取遵易易矣議既定乃令東西諸營並進親詣撫甯以督之五月十日大壽及張春邱禾嘉諸軍先抵灤城下世龍及尤世祿吳日勉楊麒王承恩繼至越二日克之而副將王維城等亦入遷安我

大清兵守永平者盡撤而北還承宗遂入永平十六日諸將謝尙政等亦入遵化四城俱復帝爲告謝郊廟大行賞賚加承宗太傅賜蟒服白金世襲錦衣衛指揮僉事力辭太傅不受而屢疏稱疾乞休優詔不允朶顏束不的反覆承宗令大將三威擊敗之復賚銀幣先以冊立東宮加太保及神宗實錄成加官亦如之並辭免而乞休不已帝命閣臣議去留不能決特遣中書齎手詔慰問乃起視事四年正月出關東巡抵松山錦州還入關復西巡徧閱三協十二路而返條上東西

邊政八事帝咸採納五月以考滿詔加太傅兼食尙書俸廕
尙寶司丞賚蟒服銀幣羊酒復辭太傅不受初右屯大凌河
二城承宗已設兵戍守後高第來代盡撤之二城遂被毀至
是禾嘉巡撫遼東議復取廣甯義州右屯三城承宗言廣甯
道遠當先據右屯築城大凌河以漸而進兵部尙書梁廷棟
主之遂以七月興工工甫竣我

大清兵大至圍數周承宗聞馳赴錦州遣吳襄宋偉往救禾嘉
屢易師期偉與襄又不相能遂大敗於長山至十月城中糧
盡援絕守將祖大壽力屈出降城復被毀廷臣追咎築城非
策也交章論禾嘉及承宗承宗復連疏引疾十一月得請賜
銀幣乘傳歸言者追論其喪師辱國奪官閒住并奪甯遠世
廕承宗復列上邊計十六事而極言禾嘉軍謀牴牾之失帝

報聞而已家居七年中外屢請召用不報明史乃撰次今古志

論著其善奸禍福以作殷鑒

畿輔人物考

十一年我

大清兵深入內地以十一月九日攻高陽承宗率家人拒守

大兵將引去繞城納喊者三守者亦應之三曰此城笑也於法當破圍復合明日城陷被執望闕叩頭投環而死年七十有

六承宗嘗云先帝以漢武鄉唐晉國擬我我則何敢成敗利

鈍非所逆覩生老病死時至則行或庶幾耳有文集一百卷

奏議三十卷南樞范景文刻而傳之別有督師全書一百卷

督師事宜十八卷車營百八十一卷舊紀四卷撫夷志十卷

高陽志十四卷前後督師紀略共二十六卷定興鹿善繼所

輯子舉人鈐尙寶丞鑰官生鋪生員鉛鐫從子鍊及孫之沆

之滂之潁之浩之瀨從孫之澈之羨之泳之澤之渙之瀚皆

戰死明史一家殉義者二十餘人人物考督師中官高起潛以

聞帝嗟悼命所司優卹當國者楊嗣昌薛國觀輩陰扼之但

復故官予葬祭而已福王時始贈太師諡文忠明史

本朝賜諡忠定勝朝殉節錄

管嗣章大甯衛人萬曆三十四年舉人知沔縣以內艱歸崇

禎己巳服闋時北城兵馬司指揮缺吏部破格用嗣章會大

盜起昌平嗣章捕得之襄城伯李國楨屬都尉來緩頰嗣章

卒置於辟東廠役有名擋兒頭者橫甚民懼其毒嗣章捧太

祖銅牌往擒之聲振京師擢刑部郎出守平涼府時郡數為

流寇蹂躪嗣章備禦惟謹八月而疾作告歸卒於家保定府志

薛一鶚字伯當定興人萬曆四十三年舉人畿輔人物考官黃州

通判荆王姬誣他姬醜世子一鶚白其誣奄人傳太妃命欲

竟其獄卒直之遷蘭州知州有惠政後罷官家居

大兵臨城佐鹿善繼城守遂同死

大清一統志

本朝賜諡節愍

勝朝殉節錄

馮冕字季服東鹿人萬曆三十四年舉人除內鄉令計捕礦

盜力復水堰置社學九十七區均力役三十四堡稱治行第

一卒於官

保定府志

耿好仁字育我定興人萬曆三十五年進士除彰德府推官

廉平仁恕擢兵部郎天啟中累官僉都御史巡撫甯夏論出

塞功晉兵部右侍郎廕一子

雍正志

周日強蠡縣人萬曆三十七年舉人除利津縣多惠政以憂

歸起武安陞甯州知州流寇神一魁等圍慶陽

保定府志

時總督

楊鶴將退守省垣已次永壽矣日強三上書鶴乃返駐甯

甘肅

通志 令日強招撫解慶陽圍陞陝西按察司僉事分守慶陽道

保定府志 逾年致仕 蠡縣志 崇禎戊寅城陷殉節 保定府志

韓東明安肅人萬曆四十年舉人知邠州城陷整衣冠北向

拜赴井死 陝西通志

本朝賜諡節愍 勝朝殉節錄

崔庚字貞甫號西星容城人性慧敏八歲就學貧不能供塾

師張敏忠捐贄儀授餐免其學中萬曆四十年舉人宰淇水

淇衝而瘠民多流亡庚除積弊驛傳之事身任之歲己巳勤

王兵舉軍糈取之民者庚借支別項事得完而淇民未知也

涖任三載諸廢俱興獎薦二十八上轉南都司城太守集善

政十事勒之石以潞糧失額謫幕徽州徽財藪幕多以賄聞

庚嚴卻之凡聽訟悉得情署太平以清白聞陞山西岳陽縣

岳陽經寇盜後人少土荒解徵仍原額庚申請照熟地徵糧
耗羨全革岳人繪像事之贊曰無矯無飾有威有儀亦瑩而
秀亦坦而直亦轟轟而烈烈亦委委而蛇蛇亦湛然而秋月
亦藹然而春颺亦百篇而工於詩吟亦十斗而豪於酒社亦
游刃而周民之隱亦永清而高吏之潔尋告歸父老攀轅泣
送絡繹二百里不絕庚嘗曰地何負於人或恐人負地耳歸
里杜門謝客以詩酒自娛范景文撫豫時稔庚治狀極薦其
才能魏大中題其讀書之室曰歲寒居其爲當代大君子所

引重如此

孫奇逢撰
墓誌銘

祀名宦祠

保定府志

鹿善繼字伯順定興人祖久徵御史以言事謫父正遠近稱
鹿太公善繼端方謹愨由萬曆四十一年進士授戶部主事
丙艱除起故官遼左餉中絕廷臣數請發帑不報會廣東進

金花銀善繼稽舊制金花儲庫備各邊應用乃奏記尙書李

汝華曰與其請不發之帑何如留未進之金汝華然之帝怒

奪善繼俸一年趣補進善繼以死爭乃奪汝華俸二月降善

繼一級調外汝華懼卒補銀進泰昌改元復原官典浙餉連

疏請帑百萬不報天啟元年遼陽陷以才改兵部職方主事

明史爲尙書崔景榮草疏請罪且請逮治逃將御史游士任馬

逢臬詆善繼爲小臣善繼抗疏辯請卽日出署帝不許高攀

龍薦善繼剛毅請以職方兼御史督輦下保甲教民忠義旨

允行竟不果

明史

大學士孫承宗理兵部事推心任之及閱

視關門以善繼從出督師復表爲贊畫倚之若左右手

明史

部缺司官羣欲挽善繼善繼曰軍中無苦樂但問所從誰相

公一日在師中某當一日在幕中承宗嘗云予居東拓地四

百里敵退七百里無一不出伯順經畫而口不言功功亦不

及

畿輔人物考

在關四年累進員外郎郎中承宗謝事善繼亦告

歸先是楊左之獄起魏大中子學洙左光斗弟光明先後投

鹿太公家太公容之與所善義士容城舉人孫奇逢謀持書

走關門告其難於承宗承宗善繼謀偕巡視薊門請入覲奄

黨大譁謂閣部將提兵清君側嚴旨阻之獄益急五日一追

賊撈掠甚苦正急募得數百金輸之而兩人者則皆已斃矣

至是善繼歸而周順昌之獄又起順昌善繼同年生善繼又

爲募得數百金金入而順昌又斃奄黨居近善繼家難家子

弟僕從相望於道正曰吾不懼也崇禎元年逆璫旣誅善繼

起尙寶卿遷太常少卿管光祿丞事再請歸九年七月

大清兵攻定興善繼家在江村白正請入捍城正許之與里居

知州薛一鶚等共守守六日而城破善繼死家人奔告正正
曰嗟乎吾兒素以身許國今果死吾復何憾事聞贈善繼大
理卿諡忠節敕有司建祠于化麟舉天啟元年鄉試第一伏
闕訟父忠踰年亦卒

明史

李國樞字元治高陽人萬曆四十一年進士由庶吉士歷官
詹事天啟六年七月超擢禮部尚書入閣釋褐十四年卽登
宰輔魏忠賢以同鄉故援之也然國樞每持正論劉志選劾
張國紀以撼中宮國樞言子不宜佐父難母而況無間之父
母乎國紀乃得免罪御史方震孺及高陽令唐紹堯繫獄皆
力保全之

明史

熹宗憑几顧命承諭傳位皇五弟大聲宣揚頃

刻而遞達轂下用絕非常熹宗大漸瑞矯遺詔而以忠賢首

受顧命國樞削之日奈何致主上亂命乎

保定府志

崇禎初以登

極恩進左柱國少師兼太子太師吏部尚書中極殿大學士

國子監生胡煥猷劾國榘等褫衣冠國榘薦復之時人稱爲

長厚明史帝命國榘定逆案訖奏曰先帝拔臣爲講官曾力辭

成命嗣感人言謬謂浣淖與居或可挽救一二不謂忠賢凡

不得於票擬者輒假上諭以行外間安從得知今幸陛下削

除滌蕩世界一新迴想臣曾待罪台司上之不能如申屠嘉

之困鄧通韓琦之斥任守中次之不能如蕭望之死於宏恭

陳蕃死於王甫雖悻惻城社熏灌力窮而一年之內猘猱與

居虺蛇與處人非鬼責無地自容乞亟賜罷免以白臣心帝

曰卿忠清端亮始終無阿心跡甚明可爲首輔機宜重務朕

今悉以委卿遣官敦趣入直國榘念帝銳意明作條次數事

以上又請優卹楊漣等皆見採納復六上疏辭帝爲感動保定

府志元年五月得請歸里薦韓爌孫承宗自代卒贈太保謚文

敏明史

劉似鰲字橫海高陽人萬曆四十一年進士歷知聞喜榆次

縣有古循良風高陽縣志開東陽鎮水渠溉田數千頃山西通志擢刑

部郎中以忤奄黨謫太平知府蔬食布衣勵精圖治秩滿遷

莊浪兵備道屢立戰功時三道缺人似鰲一身佩四符畫戰

守調兵食勞瘁成疾卒予祭葬高陽縣志

馬鐸字警愚定興人萬曆四十三年舉人知同官縣同官以

十排催科民困甚而糧益逋鐸令革十排責民於夏秋熟時

自行輸納累釋而糧亦登城枕漆同二水每合為患歲以麥

三千六百石治繕具鐸起隄障水不合西齧額派遂除同人

德之環以柳號馬公隄邑例輸秦府酒瓶差校橫索鐸扑之

以狀白王仍請自輸無遣校王聽之擢西安丞中蜚語謫河

南幕去同人祀之名宦祠尋補嘉祥數年卒於官

定興縣志

耿啟字汝東東鹿人萬歷四十四年進士宰安邑修志書復
育才館留心文教擢戶部郎出守鞏昌府治狀嚴毅苞苴不
行流賊猖獗啟守鞏有法制府洪承疇謂之曰吾嘗微行問
吏役則毀公問百姓則譽公何以得此秦州備兵使者借名
徵餉千金啟援旨以拒使者銜之以他事論劾遂歸里築室
城南隅素善琴抱琴終老焉所著有抱甕集守鞏迂言及尺

牘數卷

保定府志

王孫蕃雄縣人萬歷四十六年舉人崇禎中累官御史劾大
璫之奏事不實者直聲大著致仕歸蕃於書無所不讀尤邃
於周易嘗獨處一樓閉關自課號居易道人日披龍溪陽明

諸集所作文皆有闢人心世道之言

雍正志

李乘雲字騰洲高陽人萬曆四十六年舉人知浮山縣流賊

薄縣城乘雲手發三矢殪賊渠三人賊遂遁調翼城擢工部

主事歷員外郎中出爲山西按察司僉事分巡冀甯道叛卒

掠樂平諸邑乘雲引兵擊走之陞河南按察副使分巡大梁

道駐禹州甫期年而賊大至乘雲誓死守城而兵寡食乏歷

數日城竟陷乘雲手刃賊數人力竭被執賊欲屠城乘雲曰

拒守者吾也爾等殺吾足矣勿殺吾民闔城賴以全活賊擁

至城外強之跪乘雲曰吾朝廷大臣豈跪賊賊捽而杖之八

十罵益厲賊乃縛於樹攢射之罵不已乃斷其舌以亂刃支

解之時崇禎十四年十二月七日也當是時擁兵文武諸大

吏距賊遠訶報多不能實明年九月乘雲舊部周堯年自賊

中逸出乃以其死事狀上聞帝震悼責部臣不早省察議卹部臣以撫按未報職名為詞乘雲子宜之等叩闕陳情得旨予葬祭建祠贈諡廕子而宜之貧弱無援部覆遲迴迄國亡而卒未及卹

高陽縣志

本朝賜諡忠烈

勝朝殉節錄

河南平宜之等乃迎柩歸葬祀鄉賢及

禹州名宦祠

高陽縣志

王明善字復嬰其先小興州人七世祖宓徙新城遂家焉明善幼穎敏書過目不忘萬曆四十七年成進士除曲沃縣清操自勵暇輒論文課士經題品者多顯達為名公卿一日往謁上官途遇叛民作亂圍其輿明善舉帷諭之衆環立以視曰王公耶咸叩首解散天啟末行取入都考選授吏部未受職以疾卒明善未第時其族人有幼鬻於巨室張姓者既長

持玉帶逃歸匿明善所明善召張姓子以玉帶還之少弟殺人罪幾坐明善明善絕不置辯讞鞫者諦視之曰此金玉君子也豈毆人者耶立出之少弟亦獲免其廉介孝友蓋未易多得也子餘厚餘慎自有傳從弟建善字恢嬰萬厯中左光斗督學畿輔以建善文射俱優亟稱之久之以貢生知臨縣除歲費二萬金民德之以條陳時事忤當道調魯山時河南遭李自成蹂躪有司視爲畏途奉命之官者皆次河北不復渡民無所依歸皆相聚爲盜魯山爲盜藪久矣建善獨慨然曰受職而畏難豈人臣之義乎請憑於部單騎渡河招撫亂民獎勸忠義轉戰至魯宣布威德河南之民間有守令至始有更生之望歸附者凡數郡建善築城浚壕條守備示以無恐未幾賊遣萬餘騎送僞令至建善力戰三日夜卻走之又

郤之賊怒大至又以計破之斬首二百餘級溺水及蹂踐死者無算魯由是得安寶豐於魯爲鄰邑賊令熊一鵬據之建善擒一鵬寶豐亦以安秦督孫傳庭廉其名取入軍贊畫機務行未至而孫師潰乃懷印歸里順治初家門搜禍部索印不得已繳印復授山西祁縣知縣未幾棄去卜居易州之雙峯絕口不言世事足迹不入城市者二十餘年

新城縣採訪冊

王行健蠡縣人萬曆四十七年進士授戶部主事巡倉督廠管庫權關凡四奉命節羨金二萬有奇乞養歸臺省交薦不出已已城破與子奎光同遇難有父忠子孝之褒祀鄉賢祠

保定府志

當世爵字紹德大甯衛人萬曆中武進士任滑石堡守備堡素無井民汲數里外夏多渴死世爵爲文以禱泉忽湧出民

咸異之後累官都督同知世爵好讀書能詩文士大夫多與

之遊

雍正志

劉沂字蓮洲完縣人萬厯間任登封靜樂知縣

完縣志

性伉直

善折獄改立莊頭合戶自為輸納豪猾斂戢

山西志

歷平涼鞏

昌通判革里遞清逋賦興學校賑貧乏所至有聲入靜樂名

宦及本邑鄉賢祠

完縣志

潘甲第新安人萬厯間知萊陽縣性介而和以溫言勸民完

逋賦及解組則以差繁賦重為上官痛陳之人呼之為潘父

湖南通志

郭良時字靜宇東鹿人讀書樂道足不履城市家故貧讓產

於弟設帳授書以餬其口萬厯末年督學左光斗以德行舉

有二少年鬪里巷羣排解不息望見良時乃曰郭公來矣亟

走匿盜夜刈人禾鄰田俱盡良時禾獨存其爲人推重如此

子如僑以宿儒知名東鹿舊志事實皆所採訪

東鹿縣志

賀虎臣保定人天啟初歷天津海防遊擊登萊參將移兗州
六年遷延綏副總兵河套寇大舉入犯從帥楊肇基協擊大
破之加署都督僉事崇禎二年捕誅階州叛卒周大旺等擢
總兵官鎮守甯夏關中賊大起王嘉允陷清水營殺遊擊李
顯宗遂陷府谷其黨李老柴應之嘯聚三千餘人攻合水總
督楊鶴檄虎臣往討擊之盤谷俘馘六百有奇已擊斬慶陽
賊渠劉六四年神一元陷保安延安告急延綏撫鎮皆東援
陝西巡撫練國事檄虎臣及副將李卑援勦虎臣等遂進圍
保安賊引河套數千騎挫虎臣軍會張應昌擊敗之賊衆棄
城去虎臣等前後獲首功一千九百明年可天飛郝臨菴劉

道江李都司再圍合水虎臣偕臨洮曹文詔甘肅楊嘉謨固
原楊麒合擊大破賊甘泉之虎兕回斬首七百有奇賊大困
六年五月插漢虎墩兔合套寇五萬騎自清水橫城分道入
守備姚之夔等不能禦沙井驛副將史開先臨河堡參將張
問政岳家樓守備趙訪皆潰逃寇遂進薄靈州虎臣急領千
騎入守明史後因餉不給人言洶洶遂決意一戰集諸將誓之
曰我受朝廷厚恩今茲之戰幸則殺賊報國不幸亦不失爲
忠勇男子諸將聞誓無不奮勇爭先一以當百斬首四百餘
級繼而賊衆大集虎臣猶率部伍血戰以五千之卒當數萬
之衆面中刀創時惟四子讚相從虎臣大呼曰吾力竭矣吾
兒護印突出以白我心言訖怒目裂眦撲砍數賊力戰死

識

輔人

物考子讚挾五十騎突重圍出事聞贈虎臣都督僉事賜葬

祭世廕指揮僉事尋錄先後勦寇功再贈都督同知世廕錦

衣副千戶讚字含章勇敢有父風既承廕尋舉武進士積官

至京營副將崇禎十七年三月李自成薄京師京軍六大營

分列城外皆不敢戰或棄甲降讚獨率部卒迎擊中矢死明史

越四十日家人始得其屍面如生雍正志弟誠字九章身長七

尺美鬚髯為諸生以忠義自許兄誠副千戶早卒無子誠當

襲以讓其弟詮及賊陷保定家人勸易衣遁叱曰吾忠臣子

偷生而逃何以見先將軍地下遂偕妻女投井死明史虎臣讚

誠

本朝俱賜諡忠烈勝朝殉節錄

胡向化容城人天啟元年舉人授新泰令歷五載新泰人為

建祠遷刑部主事罪璫饋金求輕比峻卻之河臣某以不阿

權貴坐侵河帑金將重擬向化持平人不能易其援書恤刑
山西平反八十八獄晉人尸祝予告家居捐地爲學田所著
有平陽治略前徽集數卷

保定府志

許天允祁州諸生性篤孝母早逝事繼母委曲感格有閔騫
風天啟初山東白蓮教作亂天允諭以大義解散之子國士

天啟二年進士

祁州志

張居字如盤清苑人少有文譽天啟二年成進士官翰林檢
討甲申後築室山中杜門著書人有饋遺拒不受自爲墓誌
一通鏤而卷之客有訪者輒以一卷貽曰已作古人其曠介
如此高隱三十年卒年八十有二

雍正志

尹洗字淨明安肅人天啟二年進士由縣令歷工科都給事
中左遷福甯道參政歸保定崇禎十七年闖賊至分守西城

及陷被執罵賊死

本朝賜諡烈愍

勝朝殉節錄

張鵬冲字禁溟束鹿人與黃道周倪元璐友善天啟二年成

進士知確山縣整驛傳賑饑民確人頌之以忤奄黨降應天

訓導尋轉國子監學正累遷睢陳兵備道練勁卒六千人罄

家產贍之身督數十戰三摧劇寇

保定府志

斬流賊混天王等

雍正

志境內以安甲戌以後河南官多曠者鵬冲嘗兼攝五篆神

智愈茂推巡撫者再以友道周元璐遂六載不遷久之遷極

邊地道卒

保定府志

王喬棟字弱侯雄縣人天啟五年進士知朝邑縣魏忠賢黨

坐縣人王之寀賊下喬棟嚴徵喬棟不忍封印於庫而去巡

撫怒欲劾之士民擁署號呼乃止其官朝邑時蓋僅期年耳

忠賢誅起順天教授

雄縣志

累遷湖廣參政明史楚中大亂司道

多不之官喬棟兼綰七印督餉至興國州李自成率眾大至

喬棟且守且戰斬馘頗多歷數日力竭被執罵賊死州人爲

棺以殮督撫爲返葬焉

雍正志

本朝賜諡節愍

勝朝殉節錄

張果中字于度新城人鹿善繼高弟也又從學于孫奇逢左

魏之難與奇逢諸人醵金拯救及周順昌坐賊被逮復謀爲

贖罪其弟爲魏黨所偵飛書告之先是有李姓者同其父母

至白溝窳且疾果中居食之其親死李入爲闔爲忠賢所親

信凡四方書至李先視而後達忠賢告果中書至李曰此恩

人也匿其書果中乃獲免遂隱於蘇門

新城縣志

孔衍學字養邃新城人受業於鹿善繼留心經術於書無所

不讀尤精理學著書箋六十餘策左魏坐贓被逮衍學與張
果中集同志各攜數十金爲之贖罪事雖未成士論韙之

新城

縣志

刁包初名基命以避廟諱改名包字蒙吉別號用六居士邴
州人父克俊有道好施學者稱貞惠先生包年二十五舉天
啟七年丁卯鄉試再上春官不第遂絕舉子業爲齋曰潛室
亭曰肥遯讀書其中學者宗之甲申闖變設思廟主於所居
之順積樓朝夕哭臨賊欲授以僞官包以死拒幾及於難賴
賊敗得解入

國朝遂不仕日取四子五經及宋元諸儒書反復尋玩積二十
餘年年六十有六遭母喪以毀卒門人私謚爲文孝先生初
貞惠之卒也勺水不入口者三日母哭慰之始進米一溢其

治喪一倣朱子家禮既葬廬於中庭檐下斷酒肉不入內室者三年每朔望忌辰輒號泣鬚髮盡白居恒吶吶然不能言及有大事則正色而談上下傾聽流賊圍州城包毀家助守城賴以完兵退後賃屋於西關館流離者施藥餌治疾病受傷者全活甚衆有山東難婦七十餘人不能歸乃擇僕之謹慤者往送之八拜而囑之僕皆感泣盡力其日省者三日妄爲妄言妄念篤好無錫高攀龍之書爲設主奉之有過則輒詣謝可謂勇於自克者矣旣沒無錫人於道南祠崇祀焉所著有易酌十二卷四書翼註十六卷斯文正統十二卷辨道錄八卷潛室劄記二卷用六集十二卷

北學編

吳憲湯字式九清苑人天啟七年舉人歷官工部員外郎督杭關稅以廉潔著聲及歸舟中惟圖書數卷而已尋致仕躬

耕自給足不入城市者凡二十餘年

清苑縣志 案雍正志 吳憲揚傳亦云天啟中

舉人而選舉則列崇禎庚午康熙志同未知孰是

孫從範字古器清苑人天啟七年舉人甲申城陷被殺

清苑縣志

李萃秀字振揚東鹿人天啟丁卯舉人崇禎間輸米三百石

助餉詔旌其門尋知昌邑縣甫三月城破死之次子宏禎諸

生亦從死事聞與卹廕

保定府志

郭名揚字賓實清苑人爲諸生事父及繼母雷以孝聞天啟

中魏忠賢祠滿天下郡守不欲爲亦不克抗容於名揚名揚

曰陽重其事而陰緩之璫不久敗可無染也守然之未幾璫

敗建祠者皆得罪守獨全

雍正志

陳居恭字元禮安肅人以廕官都督府僉事掌錦衣衛天啟

中魏忠賢亂政錦衣官校多不法居恭疏糾之遣戍者十餘

人又申救建言被逮諸臣并劾忠賢三大罪罷職歸

雍正志

李節之蠡縣人以貢任海州同知時上官為魏忠賢私人節

之心薄之數委攝篆皆辭不應守本職廉正明決一意愛民

以病歸父老泣送百餘里崇禎丙子城破殉節詔優卹之

保定府志

保定府志

劉朝任字元弼安州人以貢令文登廉正寬簡民有掘地得

千金者白於官朝任分二百金予之餘糴粟煮粥賑饑民一

錢不染左遷慶藩長史時中外為魏忠賢立生祠朝任啟於

王請藩司止之遂致仕

同上

張羅俊字元美清苑人父純臣由武進士歷官署參將神機

營左副將生六子羅俊羅彥羅士羅善羅詰羅輔羅俊娶瞽

女終身不置妾羅彥字仲美舉崇禎二年進士累遷吏部文

選郎中楊嗣昌數借封疆事引用匪人羅彥多駁正帝疑吏部行私厥卒常充庭曹郎多罹譴者羅彥獨無所染秩滿遷光祿少卿被誣落職歸羅俊以十六年秋舉進士羅輔亦以是年舉武進士而羅彥少從父塞上習兵事初官行人奉使旋里鄉郡三被兵佐當事守禦三著功給事中時敏奉使過其地夜半欲入城羅彥不許敏劾其擅司鎖鑰羅彥疏辯帝不問十七年二月賊逼京師衆議守禦羅彥兄弟與同知邵宗元等歃血盟誓死守總兵官馬岱謁羅彥曰賊分兩道一出固關一趨河間吾當出屯蠡縣扼其衝先殺妻子而後往其城守悉屬公羅彥曰諾詰旦岱果殺妻孥十一人率師去羅彥等糾鄉兵二千分陴守羅俊守東城羅彥西北羅輔爲遊兵公廩不足出私財佐之賊遣騎呼降羅俊顧其下曰欲

降者取我首去後衛指揮劉忠嗣挺劍曰有不從張氏兄弟
死守者齒此劍怒目髮上指聞者咸憤厲守益堅賊爲引卻
已聞京師變衆皆哭北向拜又羅拜相盟誓而賊攻益急城
中多異議羅彥謂宗元曰小民無知非鼓以大義氣不壯乃
下令人綴崇禎錢一枚於項以示戴主意賊謂羅彥主謀呼
其名大詬且射書說降羅彥不顧賊死傷多攻愈力李建泰
親軍爲內應城遂陷羅俊猶持刀砍賊刀脫兩手抱賊齧其
耳血淋漓口吻間賊至益衆大呼我進士張羅俊也遂遇害
羅彥見賊入急還家大書官階姓名於壁投環死子晉與羅
俊子伸並赴井死羅善字舜卿爲諸生佐兩兄守城城將陷
兩兄戒勿死羅善曰有死節之臣不可無死節之士妻高攜
三女投井死羅善亦投他井死羅輔多力善射晝夜乘城射

必殺賊城破與羅俊奪圍走羅俊不可羅輔連射殺數人矢盡持短兵殺數人乃死張氏兄弟六人羅士早卒其妻高守節十七年至是自經死惟羅喆從水門走免其妻王亦縊死羅俊伯母李罵賊死羅彥妻趙二妾宋錢及晉妾師當圍急時並坐井旁以待賊入皆先羅彥投井死獨趙不沉家人出之羅輔妻白在母家聞變欲死侍者止之給以汲井推幼女先入已從之羅俊再從子震妻徐巽妻劉亦投井死一門死者凡二十三人

明史

羅俊及子伸

本朝賜諡烈愍羅彥及子晉諡節愍羅善羅輔入祀忠義祠

勝朝

殉節錄

孫從度字泰器清苑人崇禎元年進士累拜國子監祭酒甲申三月從度病篤京師陷不知也戶部郎余尙春從度甲戌

分校所取土青衣氍笠至牀前告以煤山之變從度不食者
 已十日聞之崛然起拊牀大哭尙春徐請所自處從度瞑目
 曰一死爾未幾賊師入其第臨榻與語從度面牆不應賊師
 數詢之從度忽斥之曰賊亦人爾直入我室蔑禮至此取牀
 頭鐵如意擊之中臂賊師大怒昇至偽將軍劉宗敏所趨害
 之宗敏曰若直頃刻死爾尙欲殺之耶令昇去從度歸慟哭

絕粒三日死妻劉氏亦投井死

保定府志

劉會昌字凝極清苑人崇禎三年舉人與郡丞邵宗元郡紳
 張羅彥等誓死守城城陷賊曳會昌至西關古廟百計誘降
 終不屈遂遇害懸首西市賊去百姓環聚呼曰此吾鄉劉凝
 極先生生不肯棄城死不肯降賊者也其收葬之

雍正志

本朝入祀忠義祠

勝朝殉節錄

王維誠號悔菴新城人崇禎三年舉人由任縣教諭歷陞至

湖廣辰常兵備道未任致仕年八十卒維誠性聰俊家貧常

鬻藏書於市或問之曰讀過矣不鬻何用客試之輒對無少

爽著艮山堂詩文集

新城縣志

賀秉鉞字司平大甯左衛人狀魁梧有膂力精騎射崇禎四

年辛未一甲三名武進士歷官天津參將壬午扶父櫬自狼

山抵臨清會城陷巷戰終日矢盡被執不屈自殺

雍正志

陳所聞新安人知平度州崇禎五年叛將李九成陷州城所

聞死之

山東通志

本朝賜諡烈愍

勝朝殉節錄

張爾翬字舉之滿城人崇禎六年舉人少異敏有才名郡士

多出其門流寇入城罵賊死

保定府志

本朝入祀忠義祠

勝朝殉節錄

孫爾禎字玉屏容城人崇禎六年舉人新城邑有冤獄爾禎

寓書邑令事得釋族黨不能葬娶者助之

保定府志

歲丙子兵逼

容與弟諸生爾祚守城有功

孫奇逢丙子城守記

明亡絕意仕進隱居

教授

大清一統志

以孝節自持

雍正志

爾祚豪邁負氣節壯年辭廩

餼授弟子經從遊甚眾著有四書事實孫奇逢序其書行之

保定府志

王家祚字五修新安人崇禎六年舉人知鄆城出奇計捕渠

盜佐充西道李某勦賊戴家廟賊平李某向家祚索金許敘

功家祚不為動日鄆無金穴安用尺寸績為趨郡泣陳鄆民

流離狀得免徵涖任兩月以病移歸甲申變屏藥絕食不數

日卒著有禮記提綱二卷五經類語刪正二卷子之徵師事

容城孫奇逢棄舉業務躬行博稽典禮著有尋樂記祀典者

略行世

雍正志

金毓峒字稚鶴保定衛人父銓戶部員外郎毓峒舉崇禎七年進士授中書舍人十四年面陳漕務稱旨授御史疏論兵部尙書陳新甲庸才誤國戶部尙書李待問積病妨賢又請渙發德音自十五年始蠲除繁苛與海內更新因言復社一案其人盡縫掖不可以一夫私怨開禍端帝多採納明年出按陝西孫傳庭治兵關中吏民苦征繕日夜望出關天子亦屢詔督趣毓峒獨謂將驕卒悍未可輕戰抗疏爭帝不納師果敗十六年冬期滿得代甫出境而賊入關復還至朝邑覈上將吏功罪而後行明年三月召對命監李建泰軍馳赴山西抵保定賊騎已逼遂偕邵宗元等共守毓峒分守西城散

家貲千餘金犒士其妻王亦出簪珥佐之京師變聞賊射書

說降眾頗懈毓峒厲聲曰正當為君父復讐敢異議者斬懸

銀牌令擊賊者自取眾爭忿斃賊多城陷明史毓峒且戰且走

血淋漓灑道上至城隅三皇廟投井死妻王氏自經雍正志其

從子振孫有勇力以武舉佐守城賊至眾皆散獨立城上大

呼曰我金振孫前日殺數賊魁者我也羣賊支解之振孫兄

肖孫子婦陳與侍兒桂春亦投井死肖孫匿毓峒之子為賊

擄掠無完膚終不言二孤獲免賊揭其首於竿書曰據城抗

節惡官逆子見者飲泣明史毓峒及肖孫振孫

本朝俱賜諡忠節勝朝殉節錄

謹案勝朝殉節錄載肖孫與明史同檢毓峒殉節卷子魯

云裕詩載肖孫振孫死節亦甚明而保定府志則云肖孫

字瑞林完縣人順治三年舉人康熙七年爲富順知縣富順承周敏後百務荒廢肖孫招流民修縣志建義學築城垣創縣署捐俸充常平倉開井以興鹽利多所規復遠人願請受廛邑大治邁疾卒於官櫬歸時民爲舁送數百里作木主祀之所載大異豈兩人歟雍正志載肖孫爲賊執拷毓峒子所在無完膚終不言毓峒諸子得免入

本朝以布衣終身與二書亦不合案其文以布衣終身者當指毓峒二子非指肖孫舊志誤採入傳則又歧中之歧也

荆琰字思美安肅庠生有武略崇禎丙子守城奮殺數人而

死詔旌之

安肅縣志

鄭延杰字君承安肅人雅馴能文丙子兵至捐資召募守城

城陷揮刃迎敵死

同上

劉三星定興縣廩生尙氣節崇禎丙子邑被兵或勸之遷徙

三星曰鹿乾嶽村居也猶入城倡守吾乃臨難倡避乎不去

城破死之同邑楊茂官靈寶知縣罷歸亦同時死

定興縣志

蔡學詩定興人官城守都司崇禎九年

大兵圍城率邑衆守城中矢死一家同死者七人有碑在城外

曰亘古名香

同上

唐中穎雄縣人崇禎丙子兵亂舉家避難父八旬病不能行

命中穎去中穎泣曰生死當相隨忍去乎城破死之

雍正志

本朝入祀忠義祠

勝朝殉節錄

王世琇字崑良清苑人崇禎十年進士授歸德推官遷工部

主事十五年二月李自成陷陳州乘勝犯歸德世琇將行僚

屬邀其守慨然曰久官其地臨難而去之非誼也遂與同知

顏則孔經歷徐一源商邱知縣梁以樟教諭夏世英里居尙
書周世樸等誓衆堅守賊攻圍七日總督侯恂家商邱其子
方夏率家衆斬關出傷守者衆遂亂賊乘之入世琇則孔並

遇害

明史

本朝賜諡節愍

勝朝殉節錄

管德升名某以字行安州人任四川兵備副使有能幼爲庶
母劉教養劉温淑有賢德知縣以真慈母額其門德升事劉
盡孝性樂善好施未冠得博士弟子員明崇禎十一年兵臨
城下守禦皆謹散顧家德升揮刀厲聲止之曰生死存亡之
際宜力守城城全家亦全若棄城顧家城破家能保乎敢言
下城者斬衆乃定又縫人城外關廂舉火敵不能近復張蓋
往來城上唱名若點兵狀敵疑之黎明遁去己丑之變衆推

德升總管東城敵船數百蜂擁至人人股栗德升曰此勢不

可以正勝當出奇退之乃以銀募壯士縋城下用火器邀攻

之眾四潰復開門出兵追擊遂大勝晚年移家蒲城寓十餘

年沒王餘佑撰墓碣銘

高重光清苑人官柏鄉訓導柏鄉饑民亂重光率僕擊敗之

康熙志擢知邱縣崇禎十一年

大清兵破邱抱邱投井死

本朝賜諡節愍勝朝殉節錄

張純儒字士芳新安貢生任臨城訓導崇禎戊寅兵至純儒

與士紳誓死守城陷攜二子端坐明倫堂曰此我盡節地也

兵至縛之樹身被數十刃兩足折擲城外兵去居人識之扶

至學宮而死保定府志

本朝入祀忠義祠

勝朝殉節錄

魏克家高陽人

明史及雍正志魏克家傳均云舉人而科分無考舉人字蓋誤

知鄒平縣有

善政尋乞歸崇禎十一年

大清兵破高陽死節

本朝賜諡節愍

勝朝殉節錄

梁以樟字公狄清苑人崇禎十二年己卯解元

畿輔詩傳云進士初

授太康令時賊盤踞中州以樟與其兄以柵悉志力拒之以

殺賊功調商邱賊攻商邱陷夫人張氏并家屬俱死以樟傷

仆亂尸中民救之三日後蘇逮刑部獄天子以為無罪出之

獄數日京師陷以樟南下參史可法軍題授兵部主事經理

河南迨命下而事不可為矣鼎革後隱居高郵施閨章有甓

湖答以樟詩云千里尋君逢卧病杖藜猶肯為開門浮家不

厭滄州僻抱膝誰知故老存白髮歎歌含涕淚殘尊風雨自

寒温扁舟歲晚歸人急信宿何年湖上邨著有甲乙議

閩若
璩軍

譜 叩否集

紅豆村
館詩話

王鼎銘字錄勲高陽人喜誦讀尙節義以貢生授虹縣教諭

誨士以忠孝爲先陞浙江合屢出奇破流寇以病歸戊寅殉

難

保定
府志

高涇字達九清苑人崇禎十五年舉人事母以孝聞甲申城

陷負母逃遇賊求釋母賊因釋其母而執之中途涇赴水死

清苑
縣志

劉名言唐縣人由貢生爲深州訓導崇禎十五年城陷死之

入名宦

雍正
志

本朝入祀忠義祠

勝朝殉
節錄

許純誠定興人崇禎中見時事日亂棄諸生登武科授濟甯
守備值土賊熾擊之乘勝窮追賊扼之於險斷一臂死其屍
不仆賊莫敢近事聞予贈廕

雍正志

劉秉仁唐縣人爲江西建昌府檢校流賊犯境秉仁匹馬長

驅身先士卒戰死贈太僕寺寺丞

保定府志

孫煌字虛白容城人任通許合流賊入境煌製木礮擊卻之

遂歸邑民泣送至二百里

同上

李邁林完縣人任澠池知縣崇禎中流寇破城不屈遇害事

聞贈都察院經歷祀名宦

雍正志

本朝賜諡節愍

勝朝殉節錄

賀珍保定人官副總兵守平則門闖賊至率千騎力戰死張

維剛清苑人官平涼通判崇禎十七年守保定城及陷被執

罵賊死

本朝俱賜諡烈愍

勝朝殉節錄

王之珽保定衛人崇禎十七年城陷同妻齊氏並三子三女

投井死同時殉節者有何一中杜日芳王

韓一作

法玉景曜干

絃

一作絃

吳棫王世珩王致中王建極王冒祚王敬嗣趙居晉

趙世珩頡學會韓延珍

一作延珍

劉士廉周之韓王建基何光岳

孫誠王繼桂

一作繼貴

楊拱辰楊善譽

一作善舉

阮積學王嘉印凡二

十五人俱保定諸生劉宗向

一作田

自重田仰名王棟凡四

人俱布衣李懋

一作茂

倫王捷張智劉養心朱永甯胡來獻

一作

猷

胡得

一作德

銀鄭國甯張嘉善楊強子凡十人俱義民或自

經或赴水或受刃死

本朝入祀忠義祠

同上

劉忠嗣清苑人官大甯都司後衛指揮同知崇禎十七年分
守東城知力不支將妻毛氏媳王氏及妹女等縊死城陷被
執罵賊奪刀殺二賊支解死

本朝賜諡忠烈

同上

呂應蛟字西安保定右衛人任密雲副總兵里居值流寇攻
城總監方正化知其能延與同守應蛟獎率士卒戮力分防
城陷猶力戰手刃十餘賊乃死同時武臣守備則張大同並
子之垣力戰死中軍則梁儒秀鎮撫則管民治千戶則楊仁
政李尙忠紀勲趙世貴劉本源侯繼先張守道百戶則劉朝
卿劉悅田守正王好善強忠武王爾祉把總則郝國忠申錫
俱殉城死

雍正志

應蛟

本朝賜諡節愍儒秀大同及大同子之垣諡烈愍民治仁政等

十四人俱入祀忠義祠

勝朝殉節錄

韓楓滿城諸生崇禎十七年居府城城陷手刃數賊同妻王氏投井死

本朝入祀忠義祠

同上

王延善號維嬰新城諸生不事舉業精性理及參同契諸書游心岐黃施藥二十年數百里內外全活甚衆甲申闖逆入犯畿內兄建善擒僞官復城邑延善於是散家貲千金粟千餘石糾義旅數千人縞素告天豎旗討賊爲檄數千言著李自成十大罪遍布遠近遂破雄縣擒僞官郝丕績等時吳三桂破賊乃遣雄縣武舉劉溶賚文送縣印及所獲馬予三桂三桂嘉之是時同事者雄縣生員馬于新城守備胡斌及延善姪祺子嚴等方進兵文安任邱新城以圖恢復文安有大

賊堅守戰不利任邱僞官已爲別隊擒殺新城僞官王某聞風潛逃其僞典史藺自仁伺延善謁三桂歸邀截於中路害之長子餘恪不忍逃亦奔入賊中尋父並遇害衆遂散易人

上谷士君子私謚曰忠烈先生

孫奇逢文集

王餘厚字若谷新城人吏部主事明善子登新城庠籍甲申國變與從父延善從兄餘恪弟餘佑餘慎友人馬于等舉義身領一哨復安州擒僞合軍勢已合而山海關總兵吳三桂迎

國師入破賊自成西遁矣馬于謀曰吾儕本期斬賊首報君父大讐耳今賊覆志已慰可投大軍見攝政王以自全餘厚不可于詣軍前王嘉之賜官不受曰非覓官也以避辜王曰義士爲主誅賊何辜錫之殊護身餘厚亦各引兵散

國朝定鼎讐家以叛誣發兵擒延善入都餘恪聞之謂餘慎曰
本與大人其事脫大人獨死吾兄弟何面目視息人間吾赴
難汝復讐餘恪遂入京死餘慎糾衆殺其讐

朝廷益怒檄天下獲餘厚等者卽決逾年餘厚夜歸視其叔建
善於姻家姻家報縣遂發兵執餘厚縛以解府知保定事者
朱甲一見大哭曰汝秀才能報君父讐吾不爾若釋縲解道
易州監司黃圖安亦擗胷泣下遂同申辨章曰王餘厚等爲
明朝秀才起義兵報君父讐所破者僞賊之城所擊者僞賊
之官所掠者僞賊之倉庫我

朝定鼎之初正宜獎勵忠義以風天下似不宜深構此獄也奉
旨餘厚等仍收新城庠籍肄業將所勦沒家產賠還餘厚既

釋與餘慎載家屬渡河隱於歸德

新城採訪案孫奇逢文
集王延善傳則延善及餘

洛均死於闖賊而新城採訪則王氏子孫具
呈送進與奇逢說參差未知孰是爰兩存之

王餘佑字申之一字介祺生而英敏善讀書年十六補弟子
員隨繼父建善任臨邑時流寇充斥餘佑見時不可爲勸建
善解組歸未幾遭本生父延善變乃奉二親廬于易州五公
山之雙峯村躬耕犂确給甘旨暇則述作不入城市者垂三
十年故世稱五公山人云所著有居諸編乾坤大略諸葛陣

圖通鑑獨觀諸書

魏坤
文集

陳嘉猷望都貢生篤學勵行從游者七十餘人皆恂恂濟濟
不問而知爲陳君弟子

望都
縣志

賊破望都死陳國政完縣武進

士崇禎十七年守保定城陷赴井死郭鳴世祁州貢生居保
定城陷時鳴世方寢疾賊入乃持棒擊賊遂遇害馮澤蠡縣
布衣賊陷蠡縣死

本朝俱入祀忠義祠

勝朝殉節錄

彭了凡蠡縣人遭闖亂棄諸生客饒陽為鄉塾師已而從孫
奇逢於蘇門或授之粟不受竟坐死嘯臺之旁奇逢為題其
墓曰餓夫墓

國朝王士禎弔之以詩曰黔敖呼餓人不受嗟來食使之當大
事必讓千乘國靈輒餓翳桑倒戟一何力簞食不忘報竟脫
宮甲逼蘇門有餓夫風節夙所植生餓蘇門下死葬蘇門側
嘯臺高峩峩百泉流湜湜清風一相映水石起寒色遐哉首
陽薇千古長太息

精華錄